

BAIM PNG MADE NA KAMAPIM MOA WOK

LUKAUT!
Nupela Inglis pepa bilong WANTOK i kam klostu!

2 GUT U AHH
 Olgeta skul long Mosbi Saut bai gat buk bilong ol yet long rait long en na kalenda bilong lukim ol de. Memba bilong ol Justin Tkatchenko i bin opim dispela ol buk taim em go long Koki praimer skul insait Nesenel Kapital Distrik. Tkatchenko tu i bin tokaut long foapela ten skul em putim mani long stretim insait long llektoret bilong em.
 Foto: Nicky Bernard



Insait
 No ken kisim Supafan long bekim IPIC dinau - Oposisen - p2

UPNG Open koles sumatin i protes - p7

Australia sanapim komiti long lukluk long pait long Manus - p7

Populesen bikpela tumas

...ol dokta singaut long famili plening

Frieda Sila Kana i raitim

LONG Papua Niugini wanpela meri i save dai long olgeta 6 au long taim ol i karim bebi. Olgeta taim, wanpela meri i kisim bel, em i stap long mak bilong dai.

I gat bikpela wari nau i stap long ol bikpela dokta bilong helt dipatmen na ol haus sik, Yunaitet Nesen na ol narapela NGO i save wok long helpim ol mama na pikinini long kantri, osem bikpela populesen tumas bai i no inap long kisim gut olgeta fri sevis gavman i wok long tok orait long en.

Dispela ol toktok i bin kamap long wanpela bikpela kibung em Helt Dipatmen wantaim UNFPA (United Na-

tions Population Fund) na Safe Motherhood Alliance i bin kamapim long asde na tude.

Gavman i go aut las wik olsem fri praimer helt ke bai kamap long olgeta hap bilong kantri, ol dokta i wari osem namba bilong ol pipel i laik kisim sevis bai winim hamas mani i go insait long dispela polisi.

I go moa long pes 2...

Painim CASH MONI bilong yu insait long KEN

"Painim CASH MONI insait long GLOBE na SITA Corned Beef or Mackerel ken"

Na kamap Wanpela LAKI WINA NAU!

Sapos yu painim displa ol CASH Moni:

- K1,000
- K500
- K100
- K50
- K10

"Anit insait long ken" Go kisim CASH MONI bilong yu long Globe dealer or kelim **Globe Hotline 422 3066**

HARIAP!!!
 Baim ol GLOBE na SITA ken mit or MACKEREL ken bilong yu NAU

Promosen bai pinis long 31st December 2013

Tripla krasas long PNG


No ken kisim supafan long bekim IPIC dinau - Oposisen

OPOSIEN i givim strongpela toklukaut i go long O'Neill gavman long no ken kisim mani bilong ol pipel long Nasfan na Nambawan Supafan long bekim dinau bilong International Petroleum Investment Company (IPIC) bilong Arab.

Deputy oposisen lida Sam Basil i tok gavman i gat 3 pela wik tasol long bekim K4 bilien kina dinau bilong Arab we gavman i kiisim dinau long yia 2009 aninit long agrimen long salim sea bilong en long Oil Search sapos gavman i no bekim dinau long Mas 14, 2014.

Mista Basil i tok Nasfan na Supafan em hatwok mani bilong ol liklik wokmanmeri bilong PNG we ol i sevim long kisim sampela winmani bihain long ol i ritaita long wok long gavman o kampani.

PNG gavman long 2009 i bin salim ol sea bilong en long Oil Search na kisim dinau mani na



gavman i save bekim long PNG LNG projek. Tasol agrimen i tok PNG gavman bai baim bek ol sea bihain long 5-pela yia.

Neks mun Mas bai makim 5-pela yia bilong dispela dil.

PNG gavman i lukluk long dinau long ol benken long baim bek dispela sea tasol IPIC bai no inap salim dispela sea i kam bek long PNG gavman.

Praim Minista Peter O'Neill i tokaut long palamen las wik olsem IPIC i



Deputy Oposisen lida Sam Basil.

bin givim notis pepa pinis long PNG gavman olsem em bai holim ol sea bilong Oil Search.

Mista O'Neill i tok PNG gavman i laik kisim bek dispela sea na i tokotk wantaim IPIC.

Ol tokotk insait long Tresari gavman i kamap olsem gavman bai no inap kisim dinau moa long dispela yia long bekim dispela dinau o mekim ol projek.

Praim Minista Peter O'Neill i tokim palamen las wik olsem gavana bilong Sentral benk i painin

mani pinis long bekim dispela dinau na kisim bek ol sea.

Las wik Foren Afes Minista Rimbink Pato wantaim ol deligesen bilong gavman i bin go long Abu Dabhi long toktok long dispela dinau na painim rot long kisim bek dispela sea.

Mista Basil i tok ol Arab i gat nem long bisnis bilong Oil na Ges long wol na dua bilong ol i op pinis long ol bai kama insait long Pasifik long rot we PNG gavman i opim pinis long sea bilong Oil Search.

Mista Basil i tok i no gat rot long gavman i painim K4 bilien long 3-pela wik. Em i tok gavman i mas sori long ol liklik manmeri bilong kantri na i no ken kisim mani bilong ol long ol supafan long baim bek dispela sea.

Em i tok gavman i mas go kisim dinau long ausait long kantri long mekim dispela wok.

Senis long konstitusen i no gat gutpela ripot bilong komiti

Oposisen i tok O'Neill gavman i yusim bikpela namba pawa long senisim planti seksen bilong konstitusen tasol i no gat gutpela ripot na wok bilong Pemenen Palamentri Komiti bilong Konstitusen na Sabodinet Lejislesen.

Oposisen i tok 4-pela bil i bin go long inkwairi long Novemba 29, 2013 long komiti i ken go na kisim tokotk na tingting bilong pablik long ol dispela senis long konstitusen.

Ol 4-pela bil ya em; Konstitusen senis bilong sitisen lo, apoinmen bilong pablik sevan, ICAC na Distrik Atoriti lo 2013.

Deputi Oposisen lida Sam Basil i tok komiti inap long holim pablik bung long Momase long Janueri 13 long Lae na Hailans rijon long Mt Hagen long Janueri 15, NGI long Kokopo long Janueri 15 na Sauten Rijon long Janueri 20, 2014 tasol ol i no bin mekim.

Inkwairi long ol dispela rijon i no bin kamap bikos i no gat mani long kamapim ol dispela kibung. Na Komiti i bin putim tasol long niuspepa na wanpela inkwairi tasol i bin kamap long Mosbi.

Mista Basil i tok no gat inap komiti memba long holim ol dispela miting na no gat pepa sabmisin i kam long pablik.

Dipatmen bilong Praim Minista na sampela liklik lain tasol long sampela dipatmen i kamap long

dispela bung long Pot Mosbi.

Mista Basil i tok vot bilong senisim konstitusen em i bikpela samting tru long lo bilong kantri tasol no gat gutpela wok painim i bin kamap na palamen i yusim tasol namba bilong en long oraitim ol dispela senis.

Mista Basil i singaut long siaman bilong Komiti Solan Mirism long mekim trupela wok na kamapim ol inkwairi na kisim tokotk bilong pablik long ol bikpela senis bilong konstitusen.

Mista Basil i tok komiti i no ken mekim mekim wansait long amamasim gavman tasol, em i tok ol i mas tingim ol pipel na mekim gut wok

Mista Basil i tok memba bilong Kerema Richard Mendani i bin holim wok olsem siaman bilong komiti tasol gavman i rausim em bikos em i mekim tru wok taim em i no tebolim ripot bilong Konstitusen senis we Praim Minista O'Neill i laik kamap long sensim bilong seksen 124 na 135 long vot i no gat bilip na skruim namba bilong de palamen bai sindaun.

Mista Basil i tok oposisien i glasim gut wok bilong gavman na lukim olsem O'Neill gavman i wok long senisim planti seksen bilong konstitusen na lo long sotpela taim.

Em i tok ol pipel bilong kantri i gat rait long save na givim tingting bilong ol tu bipo long gavman i senisim lo long palamen.

Stretim lo bilong kamap kendidet: Duban

PETROLIUM Minista Nixon Duban i singaut long Ilketoral Komisnin na gavman long stretim lo bilong kamap kendidet long sanap long ileksen long kantri.

Mista Duban i tok sampela kendidet i gat nem long planti distrik na i wok long sanap long taim bilong Nesenel ileksen na tu long ol bai ileksen.

Mista Duban i tokim palamen olsem sampela lida bilong Madang i gat nem long tupela distrik long Madang. Ol i sanap pinis long ileksen long narapela ilektoret na i lus na ol i traim gen long Madang open bai ilkesen.

Mista Duban i tok Ilketorel Komisnin opis i mas tok klia sapos em i orait long man i ken gat nem long tupela ilketoret long wanpela provins o kantri.

Mista Duban i win long 2012 nesenel

ilkesen tasol i lus long kot taim narapela kendidet, Brain Kramer i salensim win bilong em na dispela bai ileksen i kamap.

Mista Duban i bin winim bek sia bilong em olsem memba bilong Madang long bai ileksen aninit long tiket bilong PNC Pati. Em i tok Ilketorel Komisnin i mas kamapim strongpela lo bilong kendidet long taim bilong ileksen.

Mista Duban i tok i mas gat lo olsem husat i laik kamap kendidet i mas aplai i go long Ilketorel Komisnin 6 mun o 1 yia pastaim long taim bilong sainim rit.

Ilketoral komisnin i mas senisim ol polisim ol polisi bilong em na ma slarim man i mass tap long distrik moa long 2 o 3 pela yia na i mas gat family nah us long ples em laik sanap.

Mista Duban i tok pastaim memeba bi-

long Goroka Thompson Harohave i sanap tu long Madang bai-ileksen bihain long em i lusim sia bilong em long 2012 ileksen.

Bisnisman Peter Yama tu i sanap long BAI ileksen.

Mista Duban i singaut long ilektoral komisnin long strtim ol dispela lo na strongim ol sampela polisi bipo long kantri go long ileksen long 2017.

Long wankain taim Memba bilong Gumine Nick Kuman, husat tu i win long rikaukt bihain im kot oda i tok ilektoraol komisnin i mas lainim skul long ol hevi i kamap long 2012 na ol bipo ileksen na strtim rot gut long 2017 ileksen.

Mista Kuman i tok kantri i ma syusim ilektoral voting long 2017 na singaut long ilektoral komisnin long mekim wok bilong em na dunim ol hevi we i save kamap long ileksen taim.

Populesen bikpela tumas

I kam long pes 1...

Gavman i tok i no gat problem long mani, tasol ol piksa long ol haus sik i no soim dispela.

I gat planti haus sik na klinik i no gat gutpela bet bilong mama i slip long en na karim bebi na i no gat gutpela wara na lait.

Ol dokta i tok sapos yumi laikim ol polisi bilong gavman i karim kaikai, yumi mas stat long daunim namba bilong ol bebi i kamap. Ol mama i mas stopim namba bilong ol pikinini ol i karim.

Ol mama i stap long mak bilong dai, olgeta taim ol i gat bel, na tu i gat sans tu long ol bebi bai i dai o i no inap long gro gut bikos i no gat inap kaikai long mekim em i gro gut. Papa na mama na ol atoriti i gat wok long mekim ol rot nau long gutpela sindaun bilong ol pikinini na tumbuna long bihain taim.

Profesa Glen Mola, wanpela bikpela dokta bilong ol mama i tok, maski gavman i kamapim ol gutpela



Dokta Glen Mola..

polisi olsem fri edukesen na fri helt, namba bilong ol pipel bai kisim ol dispela sevis i gro moa yet, na i winim ol sevis i stap nau.

"Mak bilong populesen i go antap hariap tru em i wanpela nesanel imejensi. Em i gat pawa long bagarapim tru nesen bilong yumi long taim bihain wantaim ol tumbuna bilong yumi. Ol meri i karim hariap tumas na planti pikinini tumas i kamap long sotpela taim em i soim olsem bikpela taim nogut bai i kamap," Prof Mola i tok.

Dokta Sibauk Bieb, Eksekutiv Menesa bilong Pablik Helt i tok, ol

politisen i mas tingting long populesen taim ol i kamapim ol polisi na wanem kain hevi em i ken kamapim.

Dokta Geita i tok i no long taim i go pinis, Helt Dipatmen i bin bungim sampela ol sios lida long mekim singaut i go long ol i mas tokaut insait long ol sios long Sarere na Sande lotu long ol man meri i no ken karim planti pikinini. Bilong wanem graun i sot na ol sevis tu i sot na ol mama i gat bikpela moa sans bilong lusim laip long taim bilong ol i gat bel o long taim bilong karim bebi.

Ol lain i go pas long kibung i bin salim singaut i go long ol Memba

bilong Palamen na i bin gat ol provinsal gavana olsem Morobe Gavana, Manus, Isten Hailans na ol sampela Memba bilong Palamen olsem Sumkar Open Memba, Ken Fairweather i bin stap long harim na soim sapot bilong ol long strongim famili plening program long kantri.

Mista Fairweather em i statim pinis program bilong stopim ol mama long karim insait long ilektoret bilong em long Sumkar.

Em i bringim program bilong putim wanpela liklik gumi olsem nidel aninit long skin bilong han bilong ol meri. Dispela bai mekim ol meri i no ken karim bebi inap long 5-pela yia. Dispela samting em i no save kamapim hevi long meri na tu ol meri i ken rausim long taim ol i laik karim bebi gen.

"Gavman i mas gat strongpela tingting long long putim planti moa mani i go insait long ol sevis bilong helt na edukesen," Dokta Geita i tok.

PNG kisim K577m dinau long ADB

Stanley Nondol i raitim

ASIAN Development Bank (ADB) na PNG gavman i sainim K577 milen dinau(US\$239 milien) long dispela wik. Dispela dinau mani em i bikpela mani tru wanpela Pasifik kantri i bin kisim long ADB. Gavman bai yusim dispela mani long stretim ol rot long Hailans rijon na ol air sevis long kantri.

Minista bilong Tresari Don Polye na kantri Dairekta bilong ADB Marcelo Minc i bin sainim pepa bilong dispela bikpela dinau long Pot Mosbi.

Misat Minc i tok rot na ol ples balus i mas stap long gut long helpim sosel na ikonmik developmen bilong Papua Niugini.

Mista Minc i tok invesmen bilong ADB long dispela projek em long helpim ol manmeri wantaim ol sevis olsem maket, taun, skul na ol arapela bikpela sevis long helpim bisnis long gro na kamapim planti wok long sapatim ol pipel.

ADB i givim US\$109 milien dinau mani bilong namba tu Hailans Rijon program long stretim ol rot. Ol dispela rot long hailans bai mekim isi long ol pipel na bisnis i kisim ol egrikalsa bisnis olsem kopi, ti, na ol gaden kaikai i go salim. Moa long 40 pesen bilong populesen bilong PNG i stap long ol ples long hailans.

ADB i bin tok orait long givim US\$750 milien long 2008 long stretim ol liklik rot long hailans rijon i go joinim bikpela Hailans Haiwe na long helpim ol pipel long kisim ol sevis long ol bikpela taun.

Na US\$130 milien bai i go long ol Sivil Eviesen Developmen Invesmen Program. Dispela em i hap bilong US\$640 milien we ADB tok orait pinis long 2009. Dispela program bai helpim 21 nesanel ples balus.

ADB i tok sefti na gutpela sevis bilong balus bai opim rot bilong bisnis na ikonmi bilong kantri bai gro na i ken kamapim nupela rot bilong bisnis.

Aninit long namba wan hap bilong Hailans Rot program, ADB na PNG gavman i stretim 115 kilomita bilong rot namel long Laiagam na Porgera (65km) na Mendi -Kandep rot (50 km), 4 -pela lokal konstraksen kampani i mekim dispela rot wok na 500 pipel long kantri i kisim wok.

Aninit long dispela ADB dinau, Sivil Eviesen Developmen Program bin stretim 3-pela nesanel ples balus long kantri. Pot Mosbi, Hoskins na Mt Hagen ples balus i kisim bikpela helpim long namba wan hap bilong dispela ADB dinau.

Wanpela intenesenel na 5-pela lokal sab kontrakta wantaim 150 lokal wokman i stretim sampela sevis bilong Hoskins, Wewak, Kavieng, Gurney na Goroka ples balus.

Buai pulap long Mosbi, maski i gat tambu

Stanley Nondol i raitim

Buai i pulap long olgeta kona bilong Mosbi siti maski NCD gavana i putim bikpela tambu na i tok lo bai mekim save long husat i salim long publik ples.

Long Godons maket, Waigani maket na Koki maket na ol arapela liklik maket bai yu lukim ol manmeri i lainim buai long graun na salim olsem bipo taim nogat tambu.

NCDC i stoim olgeta buai maket na tokaut long publik olsem salim buai em bikpela tambu. Tasol buai i wok long kam long siti long de na nait na i pulap long olgeta maket.

Ol pipel long Mosbi i gat moa save long abrusim rot blok long Laloki na kisim

buai kam insait long siti long mekim isi na kwik mani.

Planti ol gutpela sitisen bilong Mosbi husat i no save kaikai buai na ol laik kaiakai tasol i save rispektim lo i paul long rot buai i kam insait.

Inap NCDC sekim gut ol kar bilong Polis na Difens i kamaaut long Laloki. i gat komplem olsem planti ol buai sela i yusim Polis na Difens long kism bual kam insait long siti.

Sampela lain i save salim buai i pren gut wantaim ol siti wokman sanap long bum get na kisim buai kam long sek poin na kam long siti.

Ol dispela lain, Polis Difens na NCDC wok mani mekim planti sait mani na larim ol buai i kam pulap long siti gen.



Minista bilong Tresari Don Polye na kantri Dairekta bilong DB Marcelo Minc i sainim ADB long long palamen haus.



BSP is proud to support Bank of Papua New Guinea's 'SAVINGS CAMPAIGN FOR YOUNG MINDS' initiative by offering KIDS SAVINGS and SUMATIN ACCOUNTS FREE of ALL service charges.

KIDS SAVINGS ACCOUNT

For children aged 0 - 15 years

- ✓ FREE deposits
- ✓ NO account fees
- ✓ Tiered interest plan

SUMATIN ACCOUNT

For full time students aged 15 - 25 years

- ✓ FREE deposits
- ✓ NO account fees
- ✓ Mobile and Internet Banking

BSP - Promoting a long term savings culture for future generations of PNG

For more information:

- ☎ 320 1212 / 7030 1212
- ✉ servicebsp@bsp.com.pg
- 🌐 www.bsp.com.pg | f b



Official Sponsor of the 2015 Pacific Games

PM O'Neill i senisim ol minista...

Stanley Nondol i raitim

PRAIM Minista Peter O'Neill i kamapa sampela senis long ol minista bilong em bihain long kolisen gavman bilong em i holim wok inap 18 mun.

Em i givim tupela wok minista i go long PNC pati bilong em yet na wanpela i go long T.H.E Pati na narapela long independen pati.

Mista O'Neill i tokaut olsem em i rausim memba bilong Hagen na lida bilong United Resources Patry, William Duma long Petrolium na Eneji na givim i go long nupela memba bilong Madang Dixon Duban. Mista Duma em bilong PNC Pati.

Memba bilong Gumine long Simbu provins na PNC Pati memba, Nick Kuman i nupela Minista bilong Edukesen na memba bilong Sohe, Delaiah Gore bilong T.H.E Pati i kamap Minista bilong Haia Edukesen. Mis Gore i kisim ples bilong THE Pati man na memba bilong Ijivitari David Arore.



IN: Robert Atiyafa



IN: Nick Kuman



IN: Delailah Gore...



AUT: David Arore



AUT: William Duma...

Memba bilong Hengenofi Robert Atiyafa i nupela Polis Minista.

Memba bilong Hagen na URP lida William Duma i bin helpim long kamapim gavman bilong Praim Minista Peter O'Neill tupela taim. Wanpela taim em bikpela hevi long politikis i bin kamap long 2011 na narapela long 2012 bihain long nesenel ileksen.

URP em i namab tri bikpela pati long kolisen gavman bilong O'Neill na tupela minista bilong URP, Dokta Fabian Pok i stap yet olsem Difens Minista na Steven Kama Bogenvile Afes.

Mista O'Neill i tok URP na Mista Duma i stap yet long gavman bilong em tasol em i tok wanem disisen URP na Mista Duma i mekim i stap wantaim ol yet.

Long taim Praim Minista O'Neill i tokaut long dispela senis, em i tok em i mekim dispela senis long gutpela bilong kantri.

Em i tok em i sanap antap long bilip olsem kantri i mas gat strongpela gavman na mekim ol gutpela wok long givim servis long ol pipel.

Mista O'Neill i tok sapos ol sampela minista i no mekim gut wok bai em i mekim wankain pasin

long rausim o senism ol.

Minista bilong Tresari, Don Polye, Minista bilong Nesenel Plening, Charlse Abel, Enga Gavana Peter Ipatas, Fainens James Marape, Pablik Entaprais Ben Micah na Fiseries Mao Zeming i go kamap long gavman haus na witnesim ol nupela minista i mekim promis long ai bilong Gavana Jeneral.

PNG ilektoral Komisen i gat Jenda Polisi

Frieda Sila Kana i raitim

PAPUA Niugini Ilektoral Komisen nau i gat wanpela Jenda long Wok Ples na Sosol Inklusen Polisi.

Dispela Jenda Wok-Ples na Sosol Inklusen Polisi em Sif Sekretri, Sir, Manasupe Zurenuoc i bin givim luksave long en long Tunde, dispela wik, na i tokaut olsem PNGEC nau i ken bihainim ol toktok i stap insait long dispela polisi.

PNG ilektoral Komisina, Andrew Trawen na Komyuniti Developmen Seketeri, Anna Solomon wantaim ol narapela Deputi Daireketa bilong PNGEC na ol Rijonal Ilektoral Menesa wantaim ol wokman na wokmeri bilong PNGEC i bin bung insait long Sioni Kami Memorial Sios long Pot Mosbi long blesim nupela yia bilong wok na long givim luksave long Jenda Wok-Ples na Sosol inklusen Polisi.



L-R Andrew Trawen, PNGEC Daireketa na Sif Sekreteri, Manasupe Zurenuoc i sanap wantaim Sekreteri bilong Dipatmen bilong Komyuniti Developmen, Anna Solomon (long baksait lain) wantaim Deputi Daireketa, Koporet I sanap long taim bilong blesim polisi buk.

FARM TRACTORS



- Slashers
- Disc Ploughs
- Disc Harrows
- Post Hole Augers
- Trailers

120hp
90hp
70hp
50hp
40hp

AGMARK MACHINERY

PORT Moresby: 323 2658 | Dgcel: 7215 0333 / 7217 9815
LAE: 472 6324 KOKOPO: 982 6748 | email: machinery@agmark.com.pg

Sif Sekretri, Zurenuo i bin tok olsem em i givim bikpela luksave long ilektoral Komisen long mekim wok i go pas long stretim sampela wok bilong jenda ikwaliti taim ol i kamapim dispela polisi.

"Mi klia olsem, dispela polisi i bihainim tingting bilong nesenel gavman na Yunaitet Nesens long jenda ikwaliti," Sir Zurenuoc i tok.

"Dispela Jenda Wok ples na Sosol inklusen polisi i soim olsem komisen i gat strongpela tingting long kamapim jenda ikwiti, rait bilong ol pipel i gat HIV/AIDs na long larim ol pipel i gat sampela hevi long bodi i wok olsem ol narapela.

Dispela bai mekim ol ileksen i kamap gutpela long givim sans long olgeta man na meri long putim vot bilong ol.

Polisi em i gat stail bilong soim olsem olgeta man i wankain, skelim gut ol servis na no ken bagarapim narapela man o meri.

Em i gat strongpela plen long harim olgeta lain na long strongim wok na i no ken senis tumas.

"Ol meri i save bungim planti salens long laip bilong ol, long olgeta de.

Pasin bilong bosim ol tumas long taim bilong ileksen em i wanpela bilong ol dispela hevi.

Olsem na yumi mas was gut na no ken mekim laip bilong ol meri i kamap moa hatwok.

Komisen i kamapim pinis pasin bilong putim ol poling but bilong man na meri. Em i min olsem, o meri bai i ken fri long makim husat ol i laikim, na man i no ken bosim ol.

"Ol kain liklik senis olsem i gat bikpela mining. Em i gutpela long Komisen i was gut long wanem kain polisi ol i putim na bai i no ken daunim ol sampela lain na larim ol narapela tasol long kisim sans long votim ol man i makim ol," Sir Zurenuoc i tok.

CS Komanda koprens kamap gut long Goroka

...Tasol tupela hevi i kamap

Sape Metta i raitim

PLANTI ol Koreksenal Sevis provinsal opisa long PNG i bin kamap na long bikpela koprens bilong ol long Mande wik i go pinis long Goroka, Isten Hailans provins.As tingting bilong dispela koprens em long toktok long ol hevi i wok long kamap insait long ol banis kalabus.

Koreksenal Sevis Komisina Martin Balthaza i tokim ol komanda na senia opisa olsem strong bilong olgeta wok insait long ol banis kalabus stap long ol komanda na opisa bilong ol.

Em i tok, planti banis kalabus i sot long ol opisa long strongim wok bilong koreksenal sevis long PNG.

“Ol banis kalabus tu i nidim ol infrastraksa divelopmen, long wanem, ol samting long ol banis kalabus olsem ol sel blok, haus slip long kompaun bilong ol kalabus, marit na singel kwota o haus slip bilong CS woka, edministresen senta na planti moa long arapela samting i wok

long bagarap. Mipela bai nidim ol infrastraksa divelopmen long olgeta banis kalabus. Dispela bai i ken helpim na apim spirit bilong ol wokman na meri na bai ol i ken mekim gut wok bilong ol.” Mista Balthaza i tok.

Em i tok long ol yia i go pinis, koreksenal sevis i bin bungim kainkain hevi namel long ol kalabus na ol woda. Na planti nius na ripot nogut i bin kamap na bagarapim nem bilong ol.

“Olsem komisina nau, mi bai wok strong, na mi no inap larim kain pasin i go insait gen long ol banis kalabus.

Ol opisa na ol wokmanmeri i mekim wok long sevim gavman na ol pipel bilong PNG tu. Yumi mas wok strong na tingting tu olsem yumi i mekim wok bilong gavman na ol pipel.” Mista Balthaza i tok.

Bihain long em i mekim dispela ol toktok long wanpela nius konprens long Goroka long Tunde wik i go pinis, Mista Balthazar i bin go daun long Goroka

Provinsal haus sik na edmit long wod bihain long em i kisim strok.

Long Trinde nait, nara-pela wanwok bilong em deputi komisina koporetiv sevis David Melenge husat i bin sindaun wantaim Mista Balthazar long dispela nius konprens i bin pundaun long hotel rum bilong em na i dai.

Melenge i bin go pas olsem siaman long lukautim dispela konprens long Goroka.

Long Fraide apinun, CS i sata long wanpela balus i go antap long Goroka na kisim Mista Balthazar i go daun long Pot Mosbi. Tasol em i dai long Sarere apinun.

Melenge i bin wok olsem CS opisa moa long 40 yia na asples bilong em Kiburu long Mendi Sauten Hailans.

Mista Balthazar tu i bin wok wantaim CS moa long 40 yia na em i bilong Turubu long Is Sepik provins.

Nau yet koreksenal sevis long PNG i sori wantaim na mekim wok bilong ol bikos long indai bilong dispela tupela bikman bilong ol.

nius Suprim kot bai harim DSIP kot long Mas 12

Stanley Nondol i raitim

SUPRIM kot long Waigani bai harim kot bilong DSIP long mun Mas 1, 2014 we oposisen i laik kisim oda long stopim 2014 DSIP fan bilong ol memba bilong palamen.

Oposisen i putim ejen aplikesen long kisim wanpela oda long stopim Minista na sekreteri bilong Dipatmen bilong Fainens, Nesenel plening na Tresari long noken givim DSIP man bilong 2014 long ol memba bilong palamen inap gavman i baim olgeta DSIP bilong 2013.

Deputi oposisen lida Sam Basil i tokaut long dispela taim em i kisim det bilong kot olsem Mas 12 bai kat harim long DSIP i kamap long suprim kot.

Mista Basil i tok em i gat bikpela nilip olsem oposisen bai winim dispela kot na bai kisim kot oda stopim 2014 DSIP mani.

Mista Basil i tok oposisen i salensim dispela long kot long putim long rekot long bihain Prais Minista na Fainens minista i no ken holim bek DSIP mani bilong ol distrik.

Mista Basil i tok moa olsem ol haus sik, rot na bris long distrik bilong em i bagarap na sapos wanpela dai i kamap long ol dispela hevi bai gavman i kisim kot.

Ol 6-pela memba bilong oposisen i no kisim ful K10 milien kina DSIP mani bilong 2013 na i pait hat wantaim gavman long las yia yet i kam inap nau.

Ol 6 pela memba bilong oposisen em;(Vanimo Green) Belden namah, (Bulolo), Sam Basil,(Pomio), Paul Tiensten, (Rabaul) Allan Marat na (Huron Galp) Ross Seymo na (Madang Regionsl) Jim Kas.

Prais Minista Peter Peter O’Neill i tokim palamen long las wik olsem olgeta memba i no gat constitutional rait long DSIP.

Oposisen i tok dispela tok tok bilong Prais Minista minim olsem em bai gktivim long laik bilong em long husat em laikim na amas em laik givim i stap long hat bilong em.

Oposisen i tok dispela i no stret bikos palamen i passim baset na lo i karamapim olgeta mani i stap long baset wantaim DSIP mani.

Fainens Minista James mMarape planti taim tokim oposisen na pablik long las yia olsem olgeta memba bia kisim DSIP mani bipo long 2013 i pinis tasol dispela i no kamap yet na nau emj nupela yia 2014.

Mista Marape i tok olsem ol memba i mas givim ol ripot o akuitel long kisim nupela DSIP manibilong 2014.

Ol oposisen memba i toke m i hat long ol i givim ripot o akuitel bilong 2013 bikos ol i no kisim mani yet na tok ol pipel long distrik bilong ol i no kisim gutpela sevis.

Laikim wok painimaut long sios propeti

SINGAUT i go long polis frod skwat long mekim wok painim long wanpela propeti long Mosbi bilong Maun Hagen Katolik Asdaiosis we wanpela man i paulim long 7-pela yia.

Asbisop bilong Maun Hagen Katolik Asdaiosis, Douglas Young SVD i mekim dispela singaut long dispela wik.

Propeti i stap long Seksen 56, Alotmen 3 long Spring Garden Rot, Gordons insait long Nesenel Kapitel Distrik.

Asbisop Young i tok bihain long planti taim ol i traun na no gat wanpela gutpela samting i kamap, ol bin rausim dispela man i paulim propeti na o wantok bilong em long las mun, tasol 24 awa sekyuriti i lukautim propeti i stap long stopim man ya na ol lain bilong em i go bek gen.

Asbisop i tok em i klia Maun Hagen Asdaiosis i papa bilong propeti, tasol moa long 7-pela yia, em i no kisim wanpela mani long dispela propeti.

Asdaiosis i laikim mani long sapotim wok bilong em na ol helt na edukesen sevis em i save givim long Maun Hagen.

Asbisop Young i tok sios i lusim moa long K4 milien taim man ya i paulim propeti moa long 7-pela yia i go pinis.


Em i askim tu wanem rot na wanem taim bai sios i kisim sampela mani em i bin lusim taim narapela man i paulim propeti.

Em i askim tu wanem rot ol bin kisim ol kot oda engsim sios bikos edvais ol i kisim i no stret.

“Kot oda oli bin givim long mun Me las yia na ol bai glasim gen long Mas 4 neks mun i bin engsim sios, tasol sios i no bin stap long kot long toktok long sait bilong em.” Asbisop Douglas i tok.

Em i tok dispela kot oda i laikim sios long go insait long lis agrimen wantaim man ol i laikim long lusim propeti, na dispela i engsim Mama Lo we i protektim o ol rait bilong ol papa bilong propeti.

AsbisopYoung i tok long 40 krismas em i stap long PNG, em i no lukim dispela kain samting i kamap long sios.



Yumi Stori long PNG LNG
with Peter Graham CBE, Managing Director, ExxonMobil PNG Limited

Dispela em i yia mipela i bin wok i go long bungim long taim Projek i bin stat. Dispela yia bai mipela i senis long Projek kontraksen i go long Prodaksen operesen – i winim bikpela mak tru bilong Papua Niugini, ExxonMobil na ol ko-venserea bilong Projek.

I gat planti salens i stap yet, tasol mipela i bilip bai namba wan LNG i kamap long namba tri kwata bilong 2014. Long taim mipela i kamap klostu long prodaksen, sefti i stap yet olsem namba wan praioriti bilong mipela. I no gat wanpela samting i moa impoten olsem sefti bilong ol wokmanmeri bilong mipela, ol kontrakta, na ol pipel husat i stap long ol komyuniti long ol hap mipela i wok long en. Mipela i laik bai “No Gat Wanpela Bai Kisim Bagarap.”

Ol kontraksen wok bilong PNG LNG bai i wok long kamap yet. Ol wok long opso paipain na Komo Ples Balus i pinis na mipela i mekim wok bilong pinisim na opim onso paipain, Hides Ges Kondiseneng Plent na LNG Plent. Drilling wok long ol ges wel i gohet yet.

Nau mipela i testim ol wok bilong LNG Plent na Hides Ges Kondiseneng Plent na paipain i stap namel, olsem na mipela i lukluk long narapela eria bilong sefti bilong Projek. Wok i kamap nau long ol fasiliti we i gat ol haidrokabon long en, olsem na i mas luksave na was gut long paipain na dispela tupela fasiliti.

Na haidrokabons em wanem samting? Haidrokabons em ol kain samting i save kamapim ilektrik pawa, trenspot na kukim kaikai na mekim ples i hat. Yumi givim kain kain nem long ol haidrokabons olsem gesolin, disel, oil, gris, na ges, wantaim dispela prodak mipela bai salim, likwifait neturel ges o LNG. Sapos yumi no lukaut gut, ol haidrokabon bai inap kamapim bagarap. Na bai yumi mekim wanem long lukautim ol fasiliti, wokmanmeri na komyuniti bilong yumi i seif?

Mipela i mekim bikpela wok long redi na testim ol fasiliti bilong mipela na ol wokmanmeri tu long taim prodaksen wok i stat. Bipo long ges i kamap long ol projek fasiliti, ol woka bilong mipela i bin stap insait long bikpela sefti na teknikel trening na imejensi dril long save gut long sefti operesen na wanem samting long mekim taim i gat imejensi i kamap long ol haidrokabon. Mipela i mekim tu ol awenes toktok wantaim ol komyuniti i stap long paipain right-of-way long lukim olsem ol tu i luksave na lukautim ol paipain i stap insait long graun we ges i ran long en. Long nait, ol manmeri long Pot Mosbi inap lukim paia bilong LNG Plent long skai, dispela i soim olsem ol i redi nau long opim dispela fasiliti. No ken tingting planti; dispela em i seif pasin bilong rausim ol haidrokabon long taim ol i wok.

Mipela i amamas tru long ol wok em 140 Papua Niugini Operesens na Mentenens treni i mekim nau. Bihain long ol i kisim besik skils trening long PNG namel long 12-18 mun, ol dispela yangpela man na meri i go pinisim wan yia trening ovasis, na ol i kam bek na skruim trening long ples wok aninit long lukaut bilong ol ovasis saveman. Ol i kisim gutpela mak tru long skul na ol i gat bikpela laik moa long lainim nupela samting long ples wok, olsem na mipela i bilip ol bai lukautim gut ol Projek fasiliti long ol yia i kam bihain.

Mipela i amamas tu long lukim dispela bikpela projek i muv i go klostu nau long pinisim kontraksen wok na senis i go long lukim ol fasiliti i op na wok i stat. Bikpela fokus bilong mipela long sefti em i namba wan bikpela praioriti.

Long dispela taim tu, mipela amamas long tokaut olsem kampani bilong mipela i senism nem Esso Highlands Limited i go long ExxonMobil PNG Limited. Ol sevei i soim olsem ol lain i paul long nem bilong mipela (Esso o ExxonMobil o PNG LNG), na mipela i amamas tu long putim nem PNG wantaim nem bilong mipela.

Mi laik harim tingting bilong yupela, na wanem ol arapela samting yupela i laik ritim. Plis salim email i kam long pnglngproject@exxonmobil.com o lukim mipela long www.pnglng.com

Gutpela de!

Nupela singel kwata bilong Kainantu polis

Sape Metta i raitim

BIKEPELA amamas i bin kamap long taim ol pipel long Kainantu distrik, Isten Hailans, i bin kapsait i go long taun bilong ol long lukim ol i opim nupela 24 rum haus bilong ol singel polis long Kainantu.

Tingting bilong wokim dispela singel kwata em olpela memba bilong Isten Hailans, Mal Kela Smith, i go pas long taim em i gavana bilong provins. Em i bin wokim plen na putim hap mani bilong mekim wok bilong sanapim dispela kwata.

Nupela gavana Julie Soso Akeke, i go het long sapotim na strongim dispela plen na em tu i putim moa mani i go long pinisim dispela wok. Na em yet i bin kamap na opim dispela nupela singel kwata.

Long taim em i opim dispela haus, Misis Akeke i tok, long ol yia i kam na i go pinis, hevi bilong lo na oda long Kainantu distrik i kamap bikpela tru. Olsem na taim ol lida long distrik na provins i wok bung, ol i wanbel na bringim ol nupela rikrut polis i go daun we ol i wok strong na daunim planti ol hevi bilong lo na oda long Kainantu.

Em i tok, sapos polis i ken mekim gutpela wok long lukautim gut lo na oda, provinsal gavman i amamas tu long lukautim ol.

“Mipela long opis long provinsal gavman na provinsal edministresen i luksave long gutpela wok ol polis long Kainantu i mekim, na mipela i wanbel long putim dispela singel kwata na haus slip long helpim ol,” Misis Akeke i tok.

Memba bilong Kainantu,

Johnson Tuke, i tok amamas long gavana long sapotim polis long ilektoret bilong em.

Em i tok, bikos long tupela wok bilong polis long distrik, hevi bilong lo na oda i go daun tru.

“Kainantu taun i no kauboi kantri moa. Em i wanpela taun we ol manmeri na pikinini long ol arapela provins i ken kam na sindaun long en. Na wantaim gutpela wok bilong ol polis, ol bikhet na trabel pasin i go daun tru, na Kainantu i kamap pisful gen,” Mista Tuke i tok.

Em i tok, long taim em i stap olsem memba, em bai sapotim gavana long bringim planti moa developmen na sevis i go long Kainantu.

Mista Tuke i bin givim faivpela kompyuta i go long Kainantu polis long mekim ol opis wok bilong ol.



Gavana bilong Isten Hailans Julie Soso Akeke i lukim gad ov ona long taim em i bin kamap long Kainantu long opim ol nupela polis singel kwata. Foto: Sape Metta

Tropical Gems kamapim gutpela senis

James G. Kila i raitim

WANPELA skul long Madang i bringim naispela tingting we i kamapim naispela senis tru long Madang taun tude.

Em i helpim planti manmeri long glasim ol yet long kamapim gutpela sindaun na wokabaut long laip bilong ol. Dispela skul o institiut nem bilong en Tropical Gems i mekim planti ol yut, husat pastaim i save bikhet na kamapim trabel nau i senisim pasin na mekim planti gutpela voluntari wok insait long

Madang taun.

Ol dispela lain yuts na ol bikman meri husat i go skul long Tropical Gems i save klinim Madang taun olgeta de na ples i luk klin tru.

Dispela program bilong ol i bin stat long las yia, na planti lain manmeri long Madang taun i guria long lukim bikpela grup yangpela manmeri i wokabaut na karim beg na kolektim rabis long taun na ol strit.

Ol dispela klinap wok em ol voluntia wok tasol, na ol sumatin ya i no kisim mani.

Tim lida Terence Konda i tok

Tropical Gems i bin wanpela kain skul bilong kompyuta, welding na ol arapela skils trening kos, tasol nau yet ol i nidim wanpela eria long operet long en.

Konda i tok ol i gat ol tul na samt-ing long wok tasol no gat haus long wok insait long en.

Em i tokaut olsem ol i wok long givim naispela skul long ol yut na tu ol pablik sevan bipo na lain i wok long praivent sekta ogenaísesen bipo nau i givim nem na laik skul long Tropical Gems.

Sampela ol mama i gat pikinini tu

i putim nem long stap long dispela skul.

Planti ol lain insait long Madang i amamas long naispela voluntia wok ol lain bilong Tropical Gems i wokim bikos ol i mekim ples na strit long Madang taun i luk klin na nais tru.

Wantok Niuspepa i bungim 4-pela sumatin bilong Tropical Gems husat i mekim bikpela voluntia wok stret taim ol i katim bikpela bus arere long rot klostu long Handy Mart maunten we Ramu NiCo (MCC) Glass-Haus opis i stap long en.

Dispela 4-pela yangpela man i mekim naispela wok tru na klinim bus i mekim dispela eria i luk nogut i kamap gutpela stret.

Mausman bilong 4-pela lain ya, Greg Suguman i tok wok ol i mekim em voluntia tasol, na ol i no inap kisim pei long en.

Tasol wok ol i mekim i givim gutpela tingting long ol long luksave long laip i go olsem wanem na wanem rot i ken helpim ol long wokabaut stret bihainim stretpela laip Papa God i laikim.

2014 Wantok Ridasip Seve Toksave



Wantok
Niuspepa Bilong Yumi Ol PNG Stret!

Dia Wantok Rida,

Wantok Niuspepa bai karim aut 2014 Wantok Ridasip Seve long neks mun Mas 2014. Dispela wok painim bai helpim Wantok long luksave na strongim wok bilong em long dispela kantri.

Stadi bai kamap long tripela rot.

- Baim niuspepa long mun Mas na pulumapim fom insait na feksim, postim o emailim i kam.
- Ol wokman bai kam long ol ples bilong baim pepa na askim ol seve kwesten.
- Kisim fom long websait: www.wantokniuspepa.com na pulumapim na salim i kam.

Taim yu bekim gut ol askim na salim fom i kam, bai yu inap long WINIM ol prais olgeta wik inap long pinis bilong seve.

Salim fom i kam long dispela edres:

2014 Wantok Ridasip Seve,

Word Publishing Company Limited

P.O. Box 1982, Boroko, National Capital District

Phone (675) 325 2500, Fax (675) 325 2579. Email: word@wantok.com.pg,

Website: www.wantokniuspepa.com

Bai Menesmen

18-pela polis opisa i kisim trening long polisi na menesmen

OL 18 senia polis opisa wantaim mobail skwad komanda, sekesen na tim lida i kisim treningwe Intanesenel Komiti bilong Red Kros (ICRC) na spesel sevis divisen bilong Royal Papua Niugini Konstabulari (RPNGC) i holim long dispela wik. Tri de woksop i bin stat long Tunde na pinis asde long Mosbi. Dispela woksop em bilong lukluk long Intanesenel polising na pawa bilong polis.

Namel long dispela, 5-pela senia opisa bilong Papua Niugini Difens Fos (PNGDF) makim maus bilong lan na solwara operesen divisen i bin stap tu long woksop. "ICRC i komited long sapatim konstabulari long mekim wok bilong em long human rait na humaniterian prinsipal long wok," het bilong ICRC misen long PNG Mista Gauthier Lefèvre i tok. "Eksampel, long 2012, polis i apim nem

bilong Intanesenel polisi standed namel long ol memba tru long publik opening na distribusen buk. Ol PNGDF kam long woksop tu i gutpela long join enfosman operesen wantaim ol polis. Mipela gat strongpela bilip olsem wokbung bilong tupela militeri fos bai kamapim strongpela kantri long bihain taim," em i tok. Sif Inspekta Perou N'Dranou, bilong Boroko polis stesen i

bin presentim keis stadi long kontrolim pait long ol publik ples. "Mi bin go stap long wanpela bung long tok-tok long publik oda menesmen long Is Esia na Pasifik, we ICRC i oganaisim long Novemba 2013 long Indonesia. Mi i bin lainim planti samting," Mista N'Dranou i tok. ICRC i bin oganaisim 5 de wankain wok bilong senia na namel renk opisa long Hailans na Buin, Arawa na Buka long Bogenvil.

Red Kros sapatim polisi bilong polis

Intanesenel Komiti bilong Red Kros igo pas long tripela de woksop bilong ol polis mobail skwad long promotim stretpela pasin bilong wok insait long Papua Niugini.



Polis Komisina Toami Kulunga.

Sampela polisman ol i bin makim long McGregor Police Barracks long Mosbi i nau stap long dispela trening we ol bai lainim gutpela pasin bilong wok long ol eria olsem; arest, detesen na mekim wok painimaut. Polis Komisina Toami Kulunga i tok publik i pret long ol polis bikos sampela memba bilong Konstabulari i no mekim gut wok bilong ol na i

mekim nabaut long rait bilong ol pipel. Mista Kulunga i tok ol ausait lain i save was long lo na oda i tok PNGi nem nogut bikos ol kain bikhet pasin i save kamap long Konstabulari olsem na ol polis i mas stap long kain woksop we ol bai lainim gut ol samting na senisim pasin bi-

long ol. Em i tok ICRC i laik opim rot bilong ol polis long lainim sampela samting we ol i save pinis na mekim gut long wok bilong polis taim ol i arestim ol saspek, kisim ol man, mekim wok painimaut long kisim ol gan o ol arapela samting we ol man i holim stap. Mista Agob, husat i olpela polis opisa i tok ICRC save olsem polis na Sekiuriti fos save mekim bikpela wok tru. Dispela woksop i bin stat long Tunde na i pinis asde.

Australia sanapim komiti bilong lukluk long pait long Manus

Imaigresen na Boda Proteksen minista bilong Australia, Scott Morrison, i tok Dipatmen bilong em i sanapim wanpela tim long glasim hevi i bin kamap long Manus Asailam-senta. Minista Morrisoni tok Seketeri bilong em, Bowles i statim pinis independen rivi tim long wok painimaut na givim ripot bek long Australia long ol ki samting

i bin kamap long Manus Ailan. Em i tok olpela seketeri bilong opis bilong Dipatmen bilong Atoni-Jeneral Attorney Robert Cornall bai go pas long dispela wok. Em i tok Minista Cornall i bin karim aut wankain wok painimaut long wanpela pasin nogut i bin kamap long Manus Ailan aninit long olpela gavman. Dispela rivi bai kamap wankain olsem bipo we ol bai bihainim

wankain rot olsem ol i bin mekim long wok painimaut long hevi olsem i bin kamap long Nauru, Villawood, na Christmas Island. Minista Morrison i tok, Mista Cornall, bai mekim ol dispela samting: ■ kisim gut trupela samting i bin kamap long hap ■ ol dispela trupela toktok bai stap ples klia long ol narapela atoriti i ken

lukim na mekim wokna ■ dipatmen bilong em mas kisim gut ol tok-tok na infomesen wantaim ol klia rekomendesen long mekim kamap gut dispela Senta we em bai helpim long menesmen long bihain taim. Em i tok rivi bai lukluk sapos i gat sampela ekesen bilong ol ol man ol i wok stap long dispela senta seifna wok orait.

Mista Morrison i tok Tems ov Referens i redi pinis na Seketeri bilong dipatmen bai givim go long Sif Mitigesen opisa long Papua Niugini bipo ol bai pinisim na bai ol ii putim long-website bilong dipatmen we ol publik i ken lukim.

UPNG Open koles sumatin i protes

Kolopu Waima i raitim

YUNIVESITI ov Papua Niugini Open Koles (UPNGOC) studen bilong Nesenel Kapital Distrik, i protes nagivim petisen long UPNG na Open Koles edministresen. Dispela i namba wan taim tru long ol i protes. Olgeta sumatin i bin protes na mas i go long Open Koles edministresen insait long UPNG kempas long Waigani na givim petisen pepa long Mande. Dispela petisen i makim maus bilong olgeta open koles long kantri. Olstuden i tok mak bilong olgeta kos ol i bin kisim long las yia i no bin kamap na makim NG o Non-Greded long transkrip o pepa we dispela mak i save stap long en. Dispela i soim olsem ol i no mekim ol dispela kos. Na em i bagarapim ol long go insait long bikpela kempas o go het na skul long open koles. "Mipela i pas o mipela i fail, em mipela no save bikos mipela i no lukim ol mak bilong mipela. Long

transkrip mipela kisim na lukim olgeta NG tasol i stap. Dispela em no bagarapim mipela tasol, em bagarapim ol narapela open koles studen stap ausait long NCD na PNG tu," ol studen i tok. Ol i kros tu olsem ol i no skul tupela wik i kam nau bikos sampela ol kos material i no stap, sampela i sot na sampela sumatin i no kisim yet. Ol i tok ol i baim K500 long wan wankos na westim planti mani. Ol studen i tok ol i givim petisen long edministresen long lukluk long ol dispelasamting natu, rausim sampela disisen edministresen i bin mekim we oli no save long entasolkirap nogut long lukim ol senis taim ol i go skul dispela yia. Ol i tok long petisen olsem edministresen i apim GPA mak long 1.75 i go long 2.0. Ol sumatin save kisim Bachelor long Bisnis Menesmen (BBM) bai kisim 10-pela kos we pastim ol i save kisim 8-pela na ol sumatin save lainim akaunting bai kisim 16-pela kos we

pastaim ol i save kisim 8-pela. Ol i tok em i olsem ol BBM studen bai baim K5,000 na Akaunting studen bai baim K8,000 long wan wan yia. Ol i givim 7-pela de long edministresen long bekim ol poin stap daun-bilo; ■ Planti sumatin i winim GPA na pinisim olgeta kos na aplai long go skul insait long main kempas tasol ol i no kisim. ■ Edministresen i no mekim awareness long toksave long ol senis kamap long apim namba bilong kos olsem 8 go antap long 10. ■ Open Koles sumatin i no save long ol sensis long apim GPA long 1.75 go long 2.0. ■ UPNG na Open Koles edministresen ifeifil long stretim tutorial klas bilong Open Koles studen bikos sampela kos i hat long ol sumatin ol yet bai mekim. ■ Edministresen i feifil long saplai olgeta kos material long taim stret. ■ Kos ol kisim na sindaun long tes tu mak bilong ol i no stap long opisal transkrip.

BACK 2 SCHOOL BACK 2 THEODIST

25% OFF!

**BACKPACKS, SACHELS, DUFFLE BAGS, LUNCHBOXES,
DRINK BOTTLES, PENCIL CASE & MORE**

smash **REYEX** **EBOX**

PROMOTION ENDS FEBRUARY 28TH!!

CALL OUR SALES TEAM TODAY!

WAIGANI DRIVE PORT MORESBY
Ph: 325 6500 Fax: 325 0302 Email: sales@theodist.com.pg
MARKHAM ROAD, LAE CITY
Ph: 472 5438 Fax: 325 0302 Email: saleslas@theodist.com.pg

THEODIST LTD
THE STATIONERY SUPERMARKET

OK Tedi Maining givim skolasip long sumatin

OK Tedi Maining Limited (OMTL) Graduet Developmen Skim (GDS) i go het long wok bilong em long developim ol yangpela Papua Niugini long wok bilong ol.

OTML keria planing na pefomans menesmen tim lida Kenny Beremao i mekim dispela toktok long presen-tesen bilong GDS skolasip long tupela Divine Wod Yunivesiti studen long Madang.

Mista Beremao i tok dispela tupela studen, Juliana Isoy na Clayton Komni, i wokim Akaunting. Wanpela wokim 3rd yia na narapela bai pinisim skul long dispela yia. Dispela skolasip i baim skul fi, kaikai long mes na slip long skul wantaim K900 alewans long wanpela tem na baim balus tiket bilong go bek long ples.

"Dispela yia tasol OTML i komitim moa



Juliana Isoy (left) kisim skolasip pepa bilong em long OTML GDS mausman.

long K95, 000 bilong skolasip," Mista Beremao tokim ol sumatin husat i bin stap long dispela bung.

Em i tok taim dispela skolasip i bin stat long 1997, moa long 40 sumatin i bin kisim helpim long GDS skolasip.

Clayton Komni i namba wan studen long Divine Wod Yunivesiti las yia long kisim dispela GDS skolasip

bikos em i bin mekim gut long skul bilong em, na nau Juliana Isoy. Dispela tupela studen i putim gutpela mak long ol narapela studen tu i ken bihainim.

"Dispela skolasip em wanpela samting bilong helpim ol long hat laip ol papamama bilong ol i kisim long salim ol pikinini go long skul olsem Divine Wod, na ol pikinini mas bihainim gut ol lo OTML i putim

long dispela skolasip," Mista Beremao i tok.

Mista Komni i tok dispela em wanpela samting em i bin driman long en na nau em i kisim sponsa long bikpela maining kampani insait long kantri.

Mis Isoy i tok em i laki long kisim dispela skolasip.

"Mi tok tenk yu long OTML long kamapim GDS skolasip," Misis Isoy i tok.

NEB tok orait long opim Pasam Nesenel

NESENEL edukesen bod (NEB) i tok orait long opim Pasam Nesenel haiskulna bai ol i kisim ol sumatin long statim klas dispela yia.

Skul bai statim klas long namba wan wik bilong namba tri mun.

Siaman bilong NEB na Seketeri bilong Edukesen Michael Tapo i tokaut long dispela long NEB miting long Lae las wik.

Mista Tapo i tok skul bai kisim 130 studen; 86 mangina 46 meri. Ol bai kisim 14 tisa wantaim hetmasta.

Em i tok dispela skul i bin pas long 2011 bikos haus bilongsilipi bagarap, waranatolet sistem i no gutpela, skul fasilitibruk daun na i bin gatdisaplin problem.

Mista Tapo i tok edukesen i gat planti salens dispela yia we

moa long 1.8 milien studen i go long skul long 2.3 milien pikinini husat inap long go long skul, 45, 647 tisa wok long 10, 466 skul insait long PNG.

"Putim mani long edukesen na trening em putim mani long gutpela bilong dispela kantri long bihain taim. Dispela yia O'Neill/Dion gavman i givim K605 milen bilong fri edukesen long olgeta skul insait long kantri. Na 8,000 skul i kisim mani bilong ol pinis,"Mista Tapo i tok.

Em i singaut i go long ol NEB memba long go het long mekim gut long fri edukesen mani mas go gut na bai mekim wok long kompalseri edukesen long neks yia.

"Tisa trening em wanpela poin we ol i bin toktok long miting.

Dipatmen i mas painim moa risos bilong tisa trening, olsem long infrastraksa, na mekim moa spes long nupela tisa," Mista Tapo i tok.

Mista Tapo i tokaut tu long nupela karikulum.Em i tok, nupela karikulum, stended bes edukesen karikulum, bai redi long neks yia. Dispela karikulum bai mekim Inglis olsem wanpela kos bilong em yet ol elementeri skul bai lainim. Wankain taim, givim moa taim long lainim Mats na Inglis long olgeta skul.

Emi tok ol skul we bin makim pinis olsem skul bilong ekselens bai kisim moa luksave long dispela yia.

"Dipatmen bai go het yet long wok wantaim developmen patna long givim edukesen sevis long PNG i kamap, helti, welti, smat-saiti,"Mista Tapo i tok.

Westpac givim kompyuta long skul

Westpac benk i givim faivpela kompyuta long Boroko Salvesen Ami praimer skul.

Skul i kisim ol dispela kompyuta long wanpela liklik seremoni long Tunde. Dispela ol kompyuta i gat ol samting bilong wok insait long em.

Westpac PNG men- seing Dairekta Geoff Toonei tok dispela ol samting ol i givim i olsem win bilong dispela skul we em bai helpim ol tisa na sumatin long mekim wok bilong ol.

"Westpac i no bilong mani bisnis tasol, mipela tu i save wok bisnis long sapotim ol komyuniti i stap long sapotim mipela tu. Sapos dispela liklik presen i mekim sampela senis long skul bilong ol sumatin, em i bikpela samting," MistaToonei tok.

Edministrata bilong Salvesen Ami praimer skul Kepten Mark Kos tok tenk yu long Westpac long dispela presen.

"Mi amamas long Westpac bikos nau

mipela bai apim level bilong ol pikinini long kisim trening long yusim kompyuta na long yusim intanet insait long skul. Dispela em i no namba wan taim mipela kisim helpim long Westpac, Westpac i save helpim mipela planti yia go pinis,"Mista Kos i tok.

James Amini, i makim maus bilong ol sumatin na tok tenk yu long Westpac long givim kompyuta.

"Dispela bai helpim mipela long save gut long yusim kompyuta taim mipela i liklik yet,"em i tok.



Sumatin wantaim ol tisa i soim kompyuta Westpac i givim long ol.

Poto Westpac media

Back to school?

A Westpac Personal Loan can help pay for your children's school fees.

You can also use it to pay for excursions and uniforms.

Find out how to apply today.

Call 322 0888

Email westpacpng@westpac.com.au

Visit www.westpac.com.pg

Banking for generations.

Things you should know: Terms and conditions apply. Lending is subject to the Bank's approval.
© 2013 Westpac Banking Corporation ABN 33 007 457 141

L-R Australia Federal Polis Asisten Komisina, Mandy Newton, Alethia Kimenez, Seif Siti Program Team Lida, Australim Minista bilong Jastis, Michael Keenan, Opisa i bosim, Gordons Maket Polis Yunit, Sgt Patricia Dikin, Delilah Sandeka, Seif Siti Program Lo na Jastis Kodineta.



Australia Minista raun long Gordons Maket

Stori na poto i kam long Australia Hai Komisen

MINISTA bilong Jastis long Australia, Michael Keenan, Hai Komisina Deborah Stokes, na Australia Federal Polis Asisten Komisina, Mandy Newton i bin lukluk raun long Gordons Maket Polis Yunit long las wik.

Gordons maket polis yunit em i stap aninit long Royal Papua Niugini Polis Konstebuleri (RPNGC) wantaim helpim bilong UN Women Seif Siti Program.

Ol dispela lain bilong Australia i bungim meri i go pas long Maket Polis Yunit, Saiden Patrina Dikin, na ol narapela memba bilong Gordons Maket Vendors Asosiesen, long lukluk moa long pasin bilong tupela polis fos i wok bung long kamapim gutpela ples we ol lain i ken mekim kam maket long Gordons.

Seif Siti Program Lo na Jastis Kodineta, Delilah Sandeka, i tok, "Long planti yia, Gordons maket i karim nem nogut long pasin bilong bagarapim ol mama na ol yangpela meri. UN Women, wantaim Nesanel Kepital Komisen na Royal Papua Niugini Konstebuleri i bin kamapim polis yunit insait long Gordons maket long mekim maket i kamap seif long ol meri.

Saiden Dikin i tok, "Dispela strongpela wok poroman wantaim Australia Polis i helpim mipela long mekim ples bilong maket i kamap seif, na mipela i ken mekim gut wok bilong mipela."

"Seif Siti Program em i gat rot bilong ol lain i kisim bagarap i ken kisim helpim long medikal, long kisim gutpela tingting na long kisim helpim long lo. Em i gutpela long helpim ol long kamap gut gen bihain long ol i kisim bagarap long han bilong ol trabelman," Saiden Dikin i tok.

U.S. Deputi Asisten Stet Seketeri i kam long PNG

U.S. Dipatmen bilong Stet Deputi Asisten Sekretri (DAS) i lukautim Australia, Nu Silan na Pasifik Afes, Dennise Mathieu, bai i kam raun long Papua Niugini stat long Mas 4 na bai i pinis long 8 Mas.



Embeseda Dennise Mathieu.

Dispela em i namba wan taim bilong DAS Mathieu long kam long PNG na em bai bungim ol opisa bilong gavman na ol sivel sosaiti long strongim wok na tingting bilong Amerika long stap na wok insait long Pasifik rijon. Em bai makim tu gavman bilong USA na toktok long PNG Wimens Forum. Dispela bikpela bung bilong ol meri bai kamap long Mas 6 na 7 long strongim wok bilong jenda ikwaliti na tokaut moa long luksave bilong ol mama na o yangpela meri insait long wol.

Embeseda Mathieu i kam long strongim gen namba wan as tingting bilong Amerika misin long sapatim wok bung, wok ples klia na mekim wok bilong ikonomi we bai i stap longpela taim long Papua Niugini. Em bai go tu long Vanuatu and Solomon Ailan.

Dennise Mathieu em i wanpela wokmeri bilong Senia Foren Sevis bilong Amerika, na em i bin kisim wok bilong em olsem Deputi Asisten Seketeri long Biuro bilong Is Esia na Pasifik Afea long Ogas 19, 2013. Pas-taim em i bin stap olsem U.S. Embeseda long Ripablik bilong Namibia long Novemba 2007 inap Septemba 2010.



PUBLIC NOTICE

AMNESTY PERIOD FOR ALL FORMS OF ILLEGAL WATER USAGE

WATER PNG is introducing an AMNESTY PERIOD effective as of the date of this advertisement to the 1st of APRIL 2014.

Over the years Water PNG has been committed to provide quality water to Papua New Guineans. However illegal water usage has drastically increased affecting our operations to continue to provide water and safe sanitation services. Hence, we are undertaking a nationwide Clean-Up Exercise to address this critical issue. Addressing illegal water usage will enable us to serve you better at an affordable cost but;

WE NEED YOU TO DO YOUR PART!

Visit your local Water PNG Office and get connected before Amnesty Ends on April 1st.

Take advantage of the Amnesty Period.

No Charges, No Penalties, No Shame! It's Amnesty!

After Amnesty, a Task Force will be deployed to identify and physically remove any illegal pipes in your area and block off main pipes.

OFFENDERS will be punished under existing laws of the Criminal Code Act and the Water and Sewerage Act. People found guilty of illegal use of water from Water PNG system without any prior written consent can be fined a penalty fee ranging from K500 to K10, 000 and/or even imprisoned (sent to jail).

Water PNG, formerly PNG Waterboard, is mandated by Parliament under the National Water Supply and Sewerage Act 1986 to coordinate planning, design and construction of water supply and sewerage infrastructure; and manage and charge for supply of water and sewerage services in Papua New Guinea except NCD. Water PNG operates in 14 Provincial Towns and five District towns in Momase, Highlands, the New Guinea Islands and Southern Region.

So Act Today, Use Amnesty and Become a Legal and Responsible Water User!

This message is APPROVED by Acting Chief Executive – Managing Director Raka Taviri Jr.

"Your life, our business"

Pop Francis selebret wantaim lapun Katolik Sister



Sutim pes bilong Jisas

DISPELA stori mi bin yusim long taim bilong Skul Misa long Sen Michael Skul long Hanu-abada, long opim 2014 skul yia.

Long wanpela de, tisa i kam long klasrum long givim lesen bilong rilijes instraksen (RE). Bipo long skulim ol, mi askim olgeta sumatin long tingim, husat man o meri em i heitim tru, o i no laikim tru. Tisa i askim ol long drom piksa bilong dispela man o meri ol i no laikim stret.

Em i givim pepa na pensil long wan wan sumatin na askim ol i mas droim pes bilong man o meri ol i no laikim.

Olgeta sumatin i bisi tru long dro. Sampela i droim pes bilong papa o mama bilong ol. Sampela i droim pes bilong bubu man o bubu meri, tisa, o pren, o brata o susa bilong ol.

Bihain long 45 minit i pinis, tisa i hangamapim wanpela bikpela waitpela pepa long blekbot long fran bilong klas.

Em i tokim ol sumatin, husat i droim pinis piksa bilong ol long putim glu long pepa na gluim long waitpela pepa em i putim pinis long blekbot.

Nau wan wan bilong ol i go long fran na putim piksa bilong ol long waitpela pepa tisa i redim pinis.

Taim olgeta i gluim pinis piksa bilong ol long waitpela pepa, na tisa i givim long ol spia na bunara na tokim ol long sutim pes bilong man o meri long piksa bilong ol.

Wan wan i kisim spia na bunara na sutim i go long pes bilong piksa bilong em. Bihain long sutim wantaim spia, sampela sumatin i no amamas yet, olsem na ol i kisim graun malu malu na bagarapim pes bilong piksa bilong ol gen.

Sampela i kisim naip na katim katim pes bilong piksa.

Na olgeta i amamas tru, bikos ol i autim belkros bilong ol i go long man o meri ol i no laikim tumas.

Tisa i askim ol, "Nu yupela i amamas a? Bikos yupela i bagarapim man o meri yupela i no laikim tumas a?"

Olgeta i singaut strong, "Yes, tisa, mipela i amamas tru!"

Taim olgeta i bagarapim pinis piksa bilong ol, tisa i isi tasol na rausim bikpela waitpela pepa, na tanim na soim long ol sumatin.

Olgeta sumatin i kirap nogut tru, bikos bihain long dispela waitpela pepa, i gat bikpela piksa bilong pes bilong Jisas. Na pes bilong Jisas i bagarap nogut tru, bikos ol yet i bin sutim wantaim spia.

Sampela i stat long kra, bikos ol i luksave nau olsem ol i bin bagarapim pes bilong Jisas.

Tisa i askim ol: "Yu save nau, wanem samting yu bin wokim? Yu wokim piksa bilong man o meri yu no laikim stret. Long pes bilong em yu bagarapim em, tasol long baksait, yu bagarapim Jisas. So, yupela i mas tingim gut, sapos yu no laikim narapela manmeri na bagarapim ol, yu heitim Jisas na bagarapim Jisas yet".

I kam long Zenit Nius ejensi, Vatiken

HARIM na bihainim, na inapim laik na singaut bilong Bikpela em samting we wanpela Katolik Sister bilong kantri Itali i mekim long 80 krismas em i stap olsem wanpela rilijes long sios.

Sister Candida Bellotti bilong Quinzano siti long Verona, Noten Itali na em i gat 107 krismas nau. Em i bin tok olsem long las wik Fonde taim em i selebretim betde bilong em long wanpela bung lotu we Pop Francis i bin go pas long em.

Sister Candida i winim ol narapela Katolik Sister long wol na kisim rekot olsem Sister i stap laip

longpela taim tru.

Selebretim betde wantaim Pope Francis em i wanpela spesel samting tru long Sister Candida husat i lukim 10-pela pop bilong Katolik Sios insait long 80 yia em i mekim wok rilijes. Em i tok dispela de i spesel betde bikos em i selebretim wantaim Pop Francis.

Sister Candida i bilong Kongrigesen bilong Ministas bilong ol Sik bilong Santu Camillus na wok bilong ol em long lukautim ol sikmanmeri.

Ol lain husat i save long Sister Candida i tok em i mekim gut stret wok bilong em we em i givim witnes long toktok bilong sariti bilong Santu Camillus i go long ol tarangu na ol sikmanmeri.

Sister Candida i tok em i amamas olsem em i kamap wanpela Sister we em i save pilim amamas stret long stap klostu long Bikpela. Na bikpela laik Bikpela i gat long yumi, na belisi em i givim.

Mama i karim Sister Candida long Februari 20, 1907 na em i namba tri long 10-pela pikinini. Wok bilong papa em long wokim ol su, na mama em i save stap long haus na lukautim famili.

Em bin mekim promis long kamap wanpela Katolik Sister long yia 1932, pastaim long Wol Woa 2. Em bin wok long Rom, Turin, Camalorena Viareggio.

Long yia 2000, ol bin salim em i go long hetkwota bilong Madahaus long Lucca long malolo.

Redi long go we wok i stap

Karen Weaver na Tim Scott- SIL- i raitim TUPELA marit bilong Ingran (England) i bihainim singaut bilong Bikpela na ol i kam bek long PNG na wok wantaim Sama Institut ov Linguistik (SIL).

Joe na Heather Patrick i bin wok long SIL, Ukarumpa, olsem ol opis ikwipmen teknisen na nesenel trenslesen edministreta long 1980 inap long 2007. Ol bin gat 4-pela pikinini na taim las pikinini bilong ol i pinisim haikul, ol bin go bek long asples bilong ol, Ingran.

Tasol long las yia, Bikpela i bin mekim klia olsem ol i mas kam bek long PNG bikos ol i gat wok i stap.

Wantaim dispela tingting na toktok, "Mipela i redi long go we i gat nid long en,"



TRENING: Sampela ol Baibel trensleta long woksop.

Ol Poto: Tim Scott

ol i kam bek na nau ol i wok olsem rijonal senta menesa.

Tupela i save pinis long tokples na kalsa, na ol i gat planti poroman long PNG, na ol i amamas long kam bek wok long PNG.

Ol trensleta bilong SIL na Baibel Trenslesen Asoiesen (BTA) i stap na wok long olgeta hap bilong kantri. Planti hap i gat ol rijonal senta long sevim ol trensleta i wok long ol dispela rijon. Ol i yusim ol senta olsem asples bilong ol trensleta i wok long en na tu, olsem ples bilong bung ol trenning woksop.

Wok bilong rijonal senta menesa em long stretim ples ol woklain i go olsem long sampela wok long hap, kukim kaikai, painim ol saplai na salim

ol i go aut, menesim ol fainens wok, mekim ol mentenens wok na redi long ol kain wok i ken kamap.

Wok bilong ol olsem ol sapot woklain i save helpim ol trensleta long wok gut long tanim ol tokples wok long ol ples.

Ol Patrick i laikim ol tanim tokples tim long wok gut na redi long ol kain salens inap kamap long wok na laip bilong ol.


"Taim mipela i kam bek long kantri, mipela i bin luksave SIL i sot long ol woklain we i karamapim tu ol rijonal senta. Mipela i tok tenkyu long kam bek hia long helpim wantaim ol wok, na mipela i bilip olsem em i taim yet we Bikpela i makim long mipela i kam bek long PNG," tupela marit i tok.

Kliam Tingting long Posin na Sanguma

PNG i stap long narapela mak bilong stap wantaim ol arapela kantri long wol. Ol nupela developmen, Kristeniti na ol nupela teknoloji i kisim yumi i go fowed, tasol strongpela bilip long sampela tumbuna samting i stap yet. Wanpela long ol em sanguma na posin we tude yumi harim, ritim na lukim planti samting i kamap insait long ol komyuniti ol i sutim tok long sanguma na posin olsem as long ol i kamap. Bilong helpim ol Kristen manmeri, bai Wantok bai putim ol sotpela toktok olgeta wik we ol save risets lain long Melanisen Institut i redim na kamapim long wanpela liklik buk ol i kolim long "Kliarim Tingting long Posin na Sanguma", Namba 2 Edisen.

Namba wan hap toktok i bin kamap las wik. Skruim toktok i go long Namba tu hap nau.

NAU long PNG, yumi save lukim planti niuspepa ripot i tok long pasin bilong kilim "ol posin



manmeri" na ol "sanguma manmeri." Planti pipel i no bilip olsem yumi save dai nating, nogut.

Ol i bilip olsem olgeta i gat as. Taim wanpela

yangpela man o meri, o wanpela bikman i dai, planti taim ol wanlain bilong em bai askim: Husat i kilim em? Ol i save abusim polis, dokta na gavman kot. Ol yet i mekim wok painimaut, na ol yet i wokim kot. Ol i save blemim o sutim tok long wanpela man o meri, givim pen long en na fosim em long konfes o tokaut olsem em i asua long mekim wanpela samting nogut, rausim em o kilim em, na kisim na stilim ol samting bilong en. Ol i save tok, "Mipela i rausim ol manmeri nogut long ples bilong mipela, bai ol i no inap bagarapim mipela gen."

Tasol dispela pasin i no save kamapim gutpela sindaun long ples. No gat tru. Planti pipel i pret long dispela pasin bilong kirapim toktok bilong posin o sanguma, pasin bilong sutim tok na pasin bilong rausim na kilim.

Ol i save wari, "Wanem taim ol bai sutim tok nating long mi na rausim mi o kilim mi?" Olsem na sampela i save lusim ples, bai ol arapela i no inap blemim ol long wanpela samting nogut, na rausim ol o kilim ol.

Moa long neks wik.



Presiden Ratu Epeli Nailatikau bilong Fiji na lain bilong em wantaim GG long welkam seremoni long gavamani haus.

Transfield Services i teko-va long Manus na Nauru asailam senta

OL tok klia i kamap olsem ol trabel na dai long Manus Ailan asailam sika ditensen senta i bin kamap insait long senta na i no ausait olsem sampela ripot midia i tok, Minista bilong Imigresen na Boda Proteksen long Australia Palamen, Scott Morrison i tok olsem.

Em i tok wok painimaut bilong ol polis investigate bai autim ol tok klia long dispela samting.

Tasol ol polis ripot i kam aut asde i tok ol trabel i bin kamap insait long ditensen senta we ol G4S sekyuriti gad i go pas long sekyuriti long hap i bin traim long stopim trabel namel long ol asailam sika, na man Iran nem bilong em Reza Barati i gat 24 krismas, i bin dai.

Ripot i tok planti asailam sika long Mike Kompaun i bin kisim bagarap na 7-pela long Oscar Kompaun i bin kalapim banis i go aut wantaim man i bin statim ol trabel em ol polis i bin holim ol na sasim ol. Wampela i bilong Lebanon na ol narapela em ol bilong Iran.

Long ol narapela ripot, Transfield Services i kisim \$1.2 bilien kontrak long menesim ol asailam sika senta long Manus na Nauru.

Long ol ripot, dispela kampani bai menesim bilding mentenens, ketering na sekyuriti sevis long Manus na Nauru.

Wok long tekova i kamap nau we G4S wantaim Salvation Army bai lusim Manu na dispela nupela kampani bai lukautim olgeta wok.

Presiden bilong Fiji i kam long PNG

FIJI na PNG i gat gutpela wok pren bilong bipo yet na wokabaut bilong Presiden Ratu Epeli Nailatikau bilong Fiji i kam long kantri i strongim moa dispela gutpela wok bung.

Presiden Ratu Epeli i bin kamap long Mosbi long dispela wik Mande na i go bek asde.

Long tok welkam long Presiden Ratu Epeli, Gren Sif Sir Michael Somare i tok amamas long em na tok wok poroman namel long PNG na Fiji i bilong bipo yet taim ol misinari, ol tisa na dokta bilong Fiji i bin kam skruim wok long ol dispela eria planti yia tru i go pinis.

"Gutpela wok pren namel long yumi i bin stat long taim ol namba wan misinari, ol dokta na tisa long kantri bilong yu i bin kam planti krismas i go pinis na givim sevis bilong ol," Sir Michael i tok.

Em i tok stat long dispela taim, tupela kantri i strongim wok pren long sosel na politiks sait na ol arapela liklik ailan kantri long Pasifik i save lukluk long Fiji na PNG olsem ol "bikpela brata."

Gren Sif i bin tokaut tu long kontribusen bilong Ratu Epeli long wok bilong painim gutpela sindaun long Bogenvil.

"Bikman, mi luksave long lidasip bilong yu taim rijonal pis kiping fos i bin stap na wok long Bogenvil bikos yu bin stap olsem Embaseda na Hai Komisina long Pasifik. Aninit long dispela, wok bilong Fiji long pis kiping opere- sen long Bogenvil i bin kam aninit long yu. Olsem hetman bilong Komonwel Eminen Pesons Grup, yu bin kam lukluk raun wantaim grup long Bogenvil long yia 2005," Sir Michael i tok.

Sir Michael i bin autim tok amamas long ol sekyuriti fos memba bilong Fiji long kontribusen bilong ol long Pis Kiping Operesen long Bogenvil.

Em i bin amamas tu olsem Fiji i wok long redi gut long nesenele ileksen bilong em long dispela yia.

Long wankain taim, Presiden Ratu Epeli i tok wokabaut bilong em bai strongim moa yet pasin brata we tupela kantri i serim long planti yia.

Em i toktok tu long kontribusen bilong em long Bogenvil taim em bin Hai Komisina i lukautim Pis Kiping Operesen bilong Fiji long Bogenvil.

Musik i ken stretim na senisim ol yut

INSAIT long Papua Niugini, planti manmeri i save tok olsem ol yut em ol as bilong ol bikhet pasin insait long ol komyuniti.

I gat planti rot long kamapim gutpela sindaun insait long komyuniti olsem kamapim ol yut grup, mekim wok bilong sios, kamapim ol spot program, na tu, kamapim ol musik studio long komyuniti.

Sereva Mea Arua husat em papa bilong Chaga Studio long Hanuabada insait long Pot Mosbi i bin stori liklik wantaim Wantok Niuspepa long las wik long astingting bilong em long kamapim musik studio long liklik hap graun bilong em.

Taim Sereva i bin wok wantaim CIS, ol i bin save kamap wantaim ol rot bilong stretim ol yut insait long ol komyuniti, na wampela rot we em i bin lukim em long musik.

Sereva i bilip olsem musik i ken senisim laip bilong ol yut husat i save bikhet insait long komyuniti. Em i tok olsem pasin raskol, smokim mari- wana, na dring hombru i ken senis o pinis sapos ol yu wok wantaim ol yut na mekim ol i bisi wantaim ol gutpela ektiviti.

"Sapos ol yut i bisi long mekim musik na singsing na rekod, ol bai i no gat taim long mekim ol bikhet pasin," Sereva i tok.

Flai ova rot long NCD

POT Mosbi i kisim planti senis nau long redi long bikpela Pasifik Gems na ol narapela bikpela miting we bai kamap long siti.

Dispela bikpela wok kamap bai lukim ol rot bilong Mosbi tu bai senis bikpela tru long abrusim ol trefik.

Wampela bilong ol dispela bikpela rot senis long Mosbi em bai lukim wampela Flai Ova rot we bai stap long bikpela ples balus long Mosbi na bai go kamap stret long Sir John Guise rot long Waigani.

Dispela kain rot bai namba wan long ol Pasifik Ailan kantri. Olgeta dispela olupela rot bai stap yet tasol ol kontrak lain bilong Nu Silan Hawkins bai sanapim ol bikpela pos long sait sait bilong rot na mekim olsem bris tasol go long narapela sait bilong olupela rot long Waigani.

Dispela nupela rot bai inap long K160 milien na bai gat 4-pela lane, longpela bilong em bai 600 mita na bai stat raun about long Jacksons ples balus na bai go pinis long raun about long Waigani long Sir John Guise draiv.

Hawkins Grup i statim wok pinis long kisim ol longpela na strongpela pos kam na ol bai shap kontrak wantaim 10-pela kampani long Mosbi long pinis rot bipo long Pasifik Gem kam long 2015.

Long opim dispela bikpela rot wok long Pot Mosbi, Prais Minista Peter O'Neill, Gavana bilong

Wol poto nius



INDIA: Wampela bikpela wail pusi o leopard i kamapim bikpela prèt long siti bilong Not India insait long wampela haus sik, wampela sinema na apatmen blok klostu long hap. Em i ronawe taim ol man i laik kisim em na kalap long ol dispela ples klostu long haus sik. Ol atoriti i pasim ol skul na kolis long Meerut, 60 kilomita long not-ist India capital taim ol i lukim dispela bikpela wail pusi i raun long strit. Ol i traim kankain we long kisim dispela enimal tasol em wok long ranawe na kamapim bikpela prèt stret long ol manmeri long hap.



PNG: Poto i soim G4S riot tim i stap autsait long long banis bilong Aisaila sika detensen senta long Manus. Witnes i tok ol G4S gad i go insait long banis na pairim gan na pretim ol asailam sika na go insait long rum bilong ol, witness i tokim ABC Nius. Taim ol i go insait, ol i stat long paitim ol asailam sika insait na planti i kisim bagarap. Witnes i tok, sampela G4S gad tu kisim bagarap taim ston i paitim ol o asailam sika i pait wantaim ol. Ol asples man tu i kam helpim ol gad na pait wantaim ol asailam sika long hap bikos G4S i no gat inap menpawa long stopim ol asailam sika.



PNG: Gavana Jenerel Sir Michael Ogio i bungim Presiden bilong Fiji, Ratu Epeli Nailatikau long Gavman Haus long dispela wik Mande. Long namba wan wokabaut i kam long PNG long dispela wik. Em i amamas long lukluk raun i kam long PNG long tripela de PNG. PNG na Fiji i gat gutpela wokpren namel long ol. Em i bin bungim Prais Minista, Peter O'Neill, Gavana Jenerel Sir Michael Ogio, Gren Sif Sir Michael Somare na ol narapela lida. Gutpela wok pren namel long PNG na Fiji i stap longpela taim we ol misinari, dokta na tisa bilong Fiji i kam wok long PNG planti krismas i go pinis," Sir Michael i tok. Poto: GG Midia

Fri helt sevis na sevim laip bilong ol pipel



Gavman i tokaut las wik olsem ol pipel husat i go kisim marasin long ol pablik haus sik bai i no inap long baim fi.

Bai ol i kisim fri tritmen. Ol mama tu husat i laik karim bebi bai i no inap tingting planti long baim bet long haus sik.

Ol bai kisim fri sevis. Gavman i tok dispela fri sevis i karamapim ol haus sik, helt senta, na etpos we i gat sevis bilong givim marasin na helpim ol sikman na meri.

Ol pipel i amamas long harim dispela gutpela nius. I tru olsem mani bilong baim marasin na kisim tritmen long ol pablik haus sik em i stap daunbilo tru sapos yumi skelim wantaim fi bilong ol praivet haus sik na klinik long kantri.

Tasol i gat planti manmeri

husat i no inap long baim fi long haus sik olsem na long taim ol i sik bai ol i gat tupela tingting long go kisim marasin na lukim dokta. Planti mama tu i no save go long karim bebi long haus sik bikos ol i no gat kain mani olsem long baim bet.

Yumi hop ol pipel bai luksave long dispela helpim i kam long gavman na i go long haus sik long taim ol i sik. Strongpela tok save i mas go long ol papamama long kisim ol pikinini i go long haus sik. Na strongpela toktok i mas go long ol mama i bel.

Long taim bilong tokaut long dispela fri sevis bilong ol haus sik, Seketeri bilong Helt i tok ol i laik lukim olgeta mama i go karim long haus sik o helt senta we i gat ol nes na dokta i ken helpim ol.

Em i tok PNG i gat nem nogut long planti moa mama na bebi i save dai long taim bilong karim. Olsem na wanpela rot bilong pulim moa mama i go karim long haus sik em long givim fri sevis long ol. Pe bilong baim bet nau em i stap long mak bilong K30 samting.

Yumi save olsem planti lain long ples i no gat kain mani olsem long spendim long haus sik. Na pasin bilong yumi PNG planti taim bai tok ol mama i ken stap na karim bebi long ples.

Long wankain taim tu yumi mas askim sapos dispela fri sevis bai i kamapim sampela hevi long baim saplai bilong ol haus sik na helt senta o nogat.

I gat dispela askim bai kamap bikos taim marasin i sot bai sampela wokman i tokim sikman olsem fri sevis olsem na no

gat mani long baim ol saplai.

Yumi wok long harim dispela kain toktok i kamap long ol skul we ol tisa i save sutim tok long papamama i no baim skul fi olsem na i no gat material na buk samting bilong skulim ol pikinini.

Narapela askim tu em long kamapim gut ol helt senta long wan wan distrik na putim dokta o helt woka husat i kisim moa trening na save long lukautim ol sikmanmeri.

Gavman i givim bikpela mani tru i go long wan wan distrik insait long kantri, olsem na i mas gat mani i go long kamapim wanpela helt senta insait long wan wan distrik.

Long ol ples we i no gat helt senta o etpos, narapela rot bilong helpim ol mama na pikinini na ol bikpela manmeri tu em

long givim trening i go long ol pipel yet long mekim wok bilong nes long ples.

Long sampela hap bilong kantri i gat ol program bilong skulim ol mama bilong ples long pasin bilong lukautim mama i gat bel na helpim em long taim bilong karim. Dispela em i wanpela bikpela na impoten skul bilong ol marasin meri bilong ples. Ol i stap na helpim ol sikmanmeri na ol mama i laik karim bebi.

Tude planti haus sik, helt senta na ol klinik i save painim hevi long lukautim ol sikman na ol mama i go long karim bikos i gat hevi bilong klinpela wara na ol arapela samting bilong wok. Ol dispela hevi bai i no inap long helpim ol sikmanmeri o ol mama, maski sapos i gat fri marasin na sevis long ol haus sik.

Olsem na sapos gavman i wari tru long gutpela helt bilong ol manmeri na pikinini bilong dispela kantri, orait ol i ken tokim olgeta distrik long putim mani long sanapim haus sik, helt senta na ol etpos na klinik.

Na i mas gat baset bilong lukautim ol long wan wan yia taim ol memba bilong palamen na join distrik sevis komiti bilong ol i sindaun long skelim mani i go long ol wok.

Sapos i no gat strongpela toktok i kam long Praim Minista yet i go long ol dispela lain, bai i no gat senis i kamap long ol ples. Moa mama na pikinini bai i wok long dai yet long wan wan yia, maski sapos i gat fri helt sevis long kantri.

CRC sios i opim Nait Baibel Skul

Frieda Sila Kana i raitim

KRISTEN Rivaivel Krused Sios (CRC) long Tokarara, Nesenel Kepital Distrik i bin opim Nait Baibel Skul bilong en long dispela wik.

Pastor Jeremy bilong Bethel Evanjelis Baibel Skul i tokaut long sampela nupela senis i kamap long karikalam bilong dispela skul olsem.

Dispela nait baible skul i save kisim ol sumatin husat i save wok tasol ol i hangre long lainim moa long Tok bilong God. Wanpela sumatin i save baim K4 long wan wan nait bilong skul. Ol i save skul long Mande na Tunde nait olgeta wik inap long wan yia.

Tasol nau ol lain i go pas long dispela skul i lukim olsem planti i save stat na i no save pinisim gut skul. Bilong wanem ol i save go aut long wok samting na i save lusim planti lekta taim.

Lo bilong skul i tok, wanpela sumatin i mas sindaun long



Pastor Jeremy bilong Bethel Baibel Koles i tok kliia long ol sumatin long nupela senis bilong Nait Baibel Skul long taim ol i opim long dispela wik Mande. Poto: Frieda Sila Kana

lekta inap long 80 pesen bilong taim bilong skul na em bai greduet wantaim setifiket. Sapos em i no kisim 80 pesen mak em ol i no inap long givim em luksave long pinisim dispela skul.

Ol sumatain bai skul long tupela hap insait long wan yia. Ol i brukim i go long Yunit 1 na Yunit 2 o blok 1 na 2. Yunit 1 bai skulim toktok bilong Kristen Faundesen o namba wan taim bilip long pasin Kristen olsem pasin bilong tanim bel,

baptais, pentekos, Jisas kaikai wantaim ol disaipel bilong en na nupela laip na kain samting olsem.

Dispela yunit i stap long 24 Februari na bai pinis long 17 Jun. Bihain long dispela ol sumatin bai i gat liklik greduesen long luksave olsem ol i pinisim dispela hap bilong trening.

Namba tu hap bilong skul bai i stat gen long 21 Julai na pinis long 4 Novemba. Nau sapos ol dispela lain i gat laik

yet long skul bai ol i ken go bek na kisim namba tu hap bilong stadi em long bikpela toktok bilong Misin na Evanjelis wok. Bihain bai ol i greduet wantaim ol Bethel Baibel Skul long Bethel Tabernacle yet.

Na sapos ol i laik go het yet long namba tu yia, em i gat Yunit 3 na 4 i stap bilong lainim tu.

Pastor Bill Vaname, Kodineta bilong dispela nait baibel skul i tok dispela skul i bin stat long bipo yet na planti sios i bin kamap wantaim ol lain i bin pinis long dispela baibel stadi klas.

"Ol lain i save kam skul em i no memba bilong CRC sios tasol, nogat. Mipela i save lukim ol Katolik, Yunaitet, Luteran, ol arapela Pentekos dinominesen, na mipela i op yet long ol i ken kam nau," Pastor Bill i tok.

Kodineta bilong dispela Nait Baibel Skul, Pastor Bill Vaname na meri bilong em, Manna i save lukautim dispela skul wantaim helpim bilong tripela wok misin meri.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta
2pm - 6pm - Sarere Avinun Cruz

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...



UB40 bai laitim Lamana

Nicky Bernard i raitim

OL FEN bilong biknem ben bilong America UB40 bai gat sans long lukim ol i pilai laip na singsing long Papua Niugini long namba wan taim long Lamana Gold Club.

Dispela laip konset pilai bilong ol bai kam long Sarere namba 12 de bilong Mun Epril 2014, na em bai wanpela taim tasol ol i pilai.

UB40 i gat bikipela fen o ol manmeri save bihainim musik na singsing bilong ol long PNG na tu ol musik bilong ol i wok long pairap yet long olgeta hap bilong PNG.

Dispela bik nem ben i salim pinis planti albam bilong ol 1970s na 1980s tasol ol singsing bilong ol i wok long kamap yet long 2000 na kam yet.

Lamana Hotel i kisim ol kam long wanem Papua Niugini save bihainim gut tru musik

singsing bilong ol na planti ol yangpela bilong nau tu i save laikim ol ragge musik bilong ol olsem na musik bilong ol i no dai long PNG, em stap stong yet wantaim ol yangpela bilong nau.

Ol redio stesin tu long kantri save pilai ol musik bilong UB40 na sampela taim ol lain bilong bipo husat save bihainim musik bilong ol i save salim tingting taim ol harim.

Lamana Hotel bai kisim sam-

pela bilong ol musik grup bilong sampela kantri tu kam pilai long Gold Club stat long mun Mas i go inap mun Epril long dispela ya.

Gold Club tu i gat nem long kisim ol bik nem ben bilong ol narapela kantri long kam pilai na amamas wantaim ol fen bilong ol long PNG.

Get fi bilong dispela nait em, long Arena K200, long Black Stage em K250 na long Balcony em K300.

EMTV Television Guide

FONDE FEBRUERI 27, 2014

4:30 AM G AUSTRALIAN NETWORK
5:00 AM G JOYCE MEYER
5:30 AM G EMTV NEWS REPLAY
6:30 AM G TODAY
9:00 AM G CLASSROOM BROADCAST

8:00 PM G RESOURCE PNG Ep#14/07
9:00 pm G GAME SHOW - Ep#1
9:30 PM G SOKA XTRA EP#14/06
9:40 PM PG ELITE MUSIC ZONE EP#2014/08
10:00 pm G NEWS REPLAY

FRAIDE FEBRUERI 28, 2014

4:00 AM G AUSTRALIAN NETWORK
5:00 AM G JOYCE MEYER
5:30 AM G EMTV NEWS REPLAY
6:30 AM G TODAY
9:00 AM G CLASSROOM BROADCAST

01:00pm - Grade 8 Maths
01:50pm - Grade 8 Science
02:30pm - DEP (I)
4:30 PM G KIDS KONA
5:00 pm G THE SHAK SERIES 2 EP#67/75
5:30 PM G SKIPPY THE BUSH KANGAROO -
5:55 PM G CRIME STOPPERS
6:00 PM G EMTV NATIONAL NEWS
7:00 PM G IN MORESBY TONIGHT -
7:30 PM PGR 2013 - NRL CLASSICS

SARARE MAS 1, 2014

4:30 AM G AUSTRALIAN NETWORK

6:00 AM G EMTV NEWS REPLAY
7:00 AM G IN HIS STEPS EP#09
7:30 AM G TBA
8:00 AM G YOGA CITY EP#12/13 rpt.
8:30 AM G AMAZING SPIES - EP#14
9:00 AM G ESCAPE FROM SCORPION IS
9:30 AM G TRICKY TV - SEASON FINALE
10:00 am G TRAPPED CASTAWAY EP#17/26
10:30AM G SKIPPY - Wombat - Rpt
11:00AM G AUSTRALIAN NETWORK
5:30 PM G OLSEM WANEM EP#14/09
6:00 PM G EMTV NATIONAL NEWS
6:30 PM PGR GREAT ANIMAL ESCAPES
7:00 PM PGR NEW GIRL S1 EP#21/24
7:30 PM PGR SATURDAY NIGHT MOVIE
9:00 PM G RAIT MUSIK REPEAT... EP#202
10:00 PM G BUSH PILOTS EP#8/10 Re-run...
11:00 PM G NATIONAL EMTV NEWS REPLAY

SANDE MAS 2, 2014

3:30 AM G AUSTRALIAN NETWORK
6:00 AM G EMTV NEWS REPLAY
6:30 AM G IT IS WRITTEN
7:00 AM G HILLSONG
7:30 AM G AUSTRALIAN NETWORK
8:00 AM G YOGA CITY EP#13/13
8:30 AM G BUSINESS PNG YR.3 #07 Rpt.
9:00 AM G MARTIN MYSTERY EP#29
9:30 AM G OLSEM WANEM EP#14/09 -
10:00 AM G RESOURCE PNG EP#14/07 Rpt.
11:00 AM G LOVE BITES WITH JOEY 2/26
11:30 AM G ITALIAN FOOD EP#2/13 Re-run
12:00 PM G AUSTRALIAN NETWORK
5:30 PM G GARDEN GURUS
6:00 PM G EMTV NATIONAL NEWS
6:30 PM G PACIFIC WAY EP#26
7:00 PM G TOK PIKSA EP#2014/09
7:30 PM G 60 MINUTES
8:30 PM PGR SUNDAY NIGHT MOVIE - The Colour Purple

TORO



BIABIA



KANAGE



SUDOKU

9	2	7	6	8	5	4	1	3
8	5	1	4	3	2	9	6	7
3	4	6	9	1	7	8	5	2
1	6	2	8	7	4	5	3	9
4	7	9	1	5	3	2	8	6
5	3	8	2	9	6	1	7	4
2	1	4	7	6	8	3	9	5
6	9	5	3	2	1	7	4	8
7	8	3	5	4	9	6	2	1


Ansa bilong las wik Sudoku # 33

1			8	5	3	7
3			2			4
	7			1	6	
9	2	4	6	8		
	1		9		2	
6		8	2	1		9
8		9			4	
5			3			1
6	3	7	5			8

Ansa bilong Sudoku # 34 neks isu



Ansa bilong las wik kroswod, isu # 2059



KROSWOD

- | | | | |
|-----------------------------|-----------------------------------|----------------------------------|------------------------------------|
| Antap | 33 Redio | save | 20 Ples long Isten Hailans |
| 1 Laikim tumas | 35 Namba | | 22 Bilong rait |
| 5 Pasin bilong ol Indonesia | 36 Melanesian Alaiens Pati | Daunbilo | 23 Sampela ka gat dispela kain gia |
| long putim kala long laplap | 37 Mak bilong kompas | 1 Pilai | 25 Siksti minit |
| 10 Pis | 38 Narapela lain | 2 Bilong sevim mausgras | 26 I no hatwok |
| 11 Wara | 39 Piliim nogut | 3 Putim i go antap | 27 Wara bilong prut |
| 12 Bihain tru | 40 Lusim ples | 4 Opisal buk bilong raun ovasis | 28 Namba |
| 14 Susa | 42 Han bilong Australia gavman | 5 Pren | 29 Namba wan man |
| 17 Bilum bilong _____ | 44 Ailan long Maikronesia | 6 Bilong lukluk | 31 Redio stesin |
| 18 Musik instramen | 46 Vinega | 7 Televisen | 34 Ol rul |
| 20 Kukim long plaua | 49 Wankain skoa long spot | 8 Yau | 37 Salim toktok long mobail |
| 21 Lait i _____ | 50 Toksave pepa bilong baim dinau | 9 Biktaun bilong Morobe | 40 Kontrolim spit bilong ka |
| 23 Mani bilong wok | 51 Teknikel nokaut long boksen | 13 Salim mani kwik long pos opis | 41 Senia plisman |
| 24 Tudak | 52 Solwara i kirap | 15 Namba | 43 Ol soldia |
| 27 Pawa masin | 53 Provins bilong ol Miok | 16 Mande em wanpela | 45 Tuna |
| 30 Kaikai go insait long en | 54 Ailan long Bogenvil | 19 Hait na lusim ples | 47 Hap diwai |
| 31 Kain gras | 55 Ples ol sumatin i kisim | | 48 Ailan long Is Sepik |
| 32 Long taim bilong Jisas | | | 50 Boil |

EMTV Television Guide

10:00 PM G HILLSONG Rpt...	02:30pm - DEP (I)	5:30 AM G EMTV NEWS REPLAY	9:30 PM G EMTV NEWS REPLAY	PYRAMID S2 EP#2/68
10:30 AM G NATIONAL EMTV NEWS - Replay	3:30PM G KIDS KONA	6:30 AM G TODAYfollowed by the Australia Network	5:00 PM G THE SHAK Series 2 Ep#65/75
.....followed by the Australia Network	HI 5 S9 EP#7/45	9:00 AM G CLASSROOM BROADCAST		5:30 PM G TRICKY TV Series 3 - Ep#20/20
	DORA THE EXPLORER S2 EP#25/26	09:00am - Grade 6 Science		_Season Finale
	PYRAMID S1 EP#52/52 (Finale)	09:50am - Grade 6 Maths	TRINDE FERRUERI 26, 2014	5:57 PM G CRIME STOPPERS
	5:00 PM G THE SHAK S2 EP#63/75	10:40am - Grade 7 Maths		6:00 PM G EMTV NATIONAL NEWS
MANDE FERRUERI 24, 2014	5:30 PM G AMAZING SPIES - EP#11/26	11:20am - Grade 7 Science	5:00 AM G JOYCE MEYER	7:00 AM G FACT FILES -
	5:55 PM G CRIME STOPPERS	01:00pm - Grade 8 Maths	5:30 AM G EMTV NEWS REPLAY	8:00 PM G OUR PORT MORESBY EP#18
	6:00 PM G EMTV NATIONAL NEWS	01:50pm - Grade 8 Science	6:30 AM G TODAY	8:30 PM G TOK PIKSA Ep#53- Repeat....
	7:00 PM G CIRCUS Ep# 2/6	02:30pm - DEP (I)	9:00 AM G CLASSROOM BROADCAST	9:00 PM G HOSTAGES S1 - EP#10
4:00 AM G AUSTRALIA NETWORK	8:00 PM PG BUSH PILOTS 8/10	3:30PM G KIDS KONA	09:00am - Grade 6 Science	10:00 PM G NEWS REPLAY
5:00 AM G JOYCE MEYER	9:00 PM G COCA-COLA SPORTS SCENE EP	HI 5 S9 EP#8/45	09:50am - Grade 6 Mathsfollowed by the Australia Network
5:30 AM G EMTV NEWS REPLAY	9:30 PM G EMTV NEWS REPLAY	DORA THE EXPLORER S2 EP#26/26	10:40am - Grade 7 Maths	
6:00 AM G TODAYfollowed by the Australia Network	PYRAMID S2 EP#1/68	11:20am - Grade 7 Science	
9:00 AM G CLASSROOM BROADCAST		5:00 pm G THE SHAK S2 EP#64/75	01:00pm - Grade 8 Maths	
09:00am - Grade 6 Science		5:30 PM G ESCAPE FROM SCORPION IS	01:50pm - Grade 8 Science	
09:50am - Grade 6 Maths	TUNDE FERRUERI 25, 2014	6:00 PM G EMTV NATIONAL NEWS	02:30pm - DEP (I)	
10:40am - Grade 7 Maths		7:00 PM G HAUS & HOME Ep#03/14	3:30PM G KIDS KONA	
11:20am - Grade 7 Science		8:00 PM G BUSINESS PNG YR.3 Ep#07	HI 5 S9 EP#9/45	
01:00pm - Grade 8 Maths	5:00 AM JOYCE MEYER	8:30 PM G MERLIN S2 - Ep#6/13	DORA THE EXPLORER S4 EP#1/25	
01:50pm - Grade 8 Science				

Ol Progam na Kilok i ken senis oltaim...

Raun wantaim Kanage olgeta wik



Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Pasim meri pikinini

TAIM bilong ileksen na ol kainkain kendidet i go kempen long ples bilong Kanage. Kanage pinis long gaden na wokabaut i kam daun long rot na lukim planti kar i ron wantaim ol manmeri antap na singaut wantaim i go long ples. Taim Kanage i wokabaut i kam, wanpela kendidet i singaut long Kanage, hei paps, inap yu pasim meri pikinini bilong yu na givim long mi. Em i min long pasim vot na givim long em. Tasol lapun Kanage i bel kaskas na tokim kendidet ya 'Yu yet pasim bilong yu na givim i kam na bai vot i go long yu'

Mambu Wantok Bilong Yu Yet

Inglis em yu ya

SIPI em wanpela lapun na em i no skul long bipo. Tasol oltaim em laik tok inglis. Olsem na taim em i raun na harim ol manmeri i tok inglis, em save lokim tasol long het na stap. Wanpela taim em sindaun



wantaim Kanage na pikinini bilong em i bik het. Kanage tokim pikinini long stap isi tasol pikinini tanim na bikmaus long Kanage. Sipi bel hat olgeta na singaut long tok inglis, "Hey Son! Don't you off the maus to your father. I you father grow you big!" Kanage i laik paitim pikinini bilong em tasol isi em lusim em i go na lap stret long tok tok bilong Sipi.

J Baiwara Mosbi

San na mun

Kanage wantaim poroman bilong em Orike

pilai snuka long haus bilong Kanage. Sam-pela meri Kerema go long haus bilong Kanage long kisim wara long paip wara bilong Kanage long wanem ol nogat wara long hap bilong ol. Orike lukim ol meri Kerema wokabaut go arere long haus na em giaman na tokim Kanage, "Aiyoy, perendo! Bikpela kus stret pas long trau-sis bilong

yu ya!" Kanage paul olgeta na hariap tru rausim trau-sis bilong em. Ol meri Kerema lukim Kanage sanap as nating na wanpela bilong ol tok, "Aiyoy, san tasol bikpela mun kam aut." Kanage harim olsem na bekim, "Sapos mun i sain long ai bilong yu, yu bai tingting na pilim olsem yu stap long mun ya." Meri ya harim bekim bilong Kanage na em tok, "Ating mun ya i mas i gat strongpela lait bilong paulim tingting bilong man gen ya."

Wopa Mote Mosbi

Ol skwat! Teksim ol gutpela Kanage tok pilai i kam long: Txt: 72356149

MI YANGPELA man na mi gat 21 krismas, tasol mi wok long kela na mi gat bikpela wari. Inap Laiplain i helpim mi?

Dia Laiplain

Ml wanpela yangpela man i gat 21 krismas tasol na mi wok long stap amamas long laip bilong mi. Tasol mi wok long lukim olsem gras bilong mi long het i wok long lus. Papa bilong mi i bin gat kela taim em i gat klostu 50 krismas. Brata bilong mi i gat 27 krismas na em i save putim kep long het olgeta taim, tasol em i nogat kela. Nogut em i stap long famili bilong mi long ol man i yangpela yet na ol i kela, tasol mi no painim yet long famili long wanpela i yangpela yet olsem mi na em i ka map kela. Mi save putim kep olgeta taim long haitim gras bilong mi i wok long lus, na tu, mi no save raun wantaim ol poroman nau. Mi save stap mi yet long rum. Mi no laik wari planti long dispela, tasol i gat sampela ples mi ken kisim helpim long en? Mi bai wokim olgeta samting long mekim laip bilong mi i gutpela.

Desperate to socialize again

Dia Pren

Tenkyu long serim wari bilong yu wantaim mipela. Yu yangpela man tumas long gat kela taim yu gat 21 krismas yet. Yu tok olsem papa bilong yu i bin gat 50 yia pas-taim em i go kela na yu no klia watpo stret na yu wok long laik kela taim yu yangpela tumas.

Long medikel sait, ol i kolim kela long "ALOPECIA". Em i stret taim yu tok ol pikinini i ken kisim kain situesen bikos em i stap insait na kamap long famili. Tasol i gat ol narapela samting we inap mekim na kela i kisim yu hariap stret. Yu no tokim mipela long laipstail bilong yu na kain ples yu stap long en, wari i wanpela long ol samting we i ken kamapim dispela. Sapos yu stap long siti, planti taim, siti laip i kamapim ol wari long planti manmeri long ol samting olsem haus, mani, ples bilong stap, prais bilong ol samting i antap tumas, stadi, poroman, nogat poroman o hasulain, sekyuriti, kaikai, helt na planti moa. Sapos sampela long ol em yu gat wari long ol, samtign olsem bai kamap long yu. Yu traim long stretim ol samting i kamapim bikpela wari long yu? Yu wokim samting long helpim yu daunim ol kain hevi yu wok long bungim?



Yu ken go lukim wanpela dokta na sekap. i gat ol narapela gutpela velyu o samting yu gat yu ken yusim long kamapim gut laip na sindaun bilong yu? Wanpela em, yu ken rait gut? Ating yu mas gat ol narapela gif yu no save long ol we yu ken yusim. Yu ken mekim lista long ol gutpela velyu yu gat na wanem ol samting ol narapela pipel i tok i gutpela yu gat long en, na strongim ol dispela.

Mipela i bilip olsem yu amamas long i gat na lus tingting long wanem samting narapela lain i tingting long yu. i no naispela luk-luk tasol pipel i save painim long ol narapela, tasol pasin samting i bikpela moa. Manmeri i luknais o nogat, i gat planti samting o turangu em ol samting bilong nau tasol na ol bai pinis.

Ol samting we man i gat insait olsem tok tru o i no giaman pasin, rispek, laikim pasin, mekim gut long narapela na daunpasin em ol gutpela pasin man i gat long en. Bai yu painim ol dispela kaikai long Baibel Gale-siens 5:22-23.

Olsem hap tok i stap," kela em i naispela", yu lukluk na bai yu lukim planti yan-pela na bikpela man i kela, tasol ol i stap nomol na amamas wok na raun i stap bikos dispela em i laip. Mipela i luksave olsem yu yangpela yet na yu wari, tasol traim givim liklik tingting olsem, wari na i no go hetim nomol laip bai helpim yu stretim wari yu gat long en o nogat. i gat muvi ekta i gat kela olsem Yu Bryner na ol narapela, tasol ol i mekim gut long laip na wok bilong ol.

Yumi wan wan man i narakain na mama i karim yumi na ol samting em yumi kisim long famili. Na yumi no inap wokim senis long ol. Yu mas velyuim o amamas long samting yu gat long en bikos yumi wan wan i spesel na i narakain long wanem, dispela em i plen bilong God yet.

I gat ol kain manmeri long dispela wol na sampela i mekim wok bilong ol i stap, taso,

i gat ol narapela we i suvim nous bilong ol long samting bilong ol narapela. Tasol taim yu stap gut na mekim gut long ol narapela nay u lukautim yu yet gut long sait bilong helt, gutpela pasin, hasu nap les yu stap long em i stret na luksave long ol narapela bai pulim pipel i kam long yu, maski i gat ol narapela samting yu ting i rong long yu.

I gat ol kemis yu ken go long ol na askim long minoxidil na ol narapela marasin bai helpim gras bilong yu i groa. Sapos yu laik, yu ken go long kosmetolojiks na em bai putim giaman gras, o baim giaman gras na putim. i gat ol hebol marasin yu ken kisim, tasol yu mas painaut long wanem hap stret yu ken kisim ol.

Serim wari bilong yu wantaim papamama na ol narapela famili memba. Mipela i bilip olsem i gutpela yu miks wantaim ol narapela manmeri na ol famili memba bilong yu na bai yu pilim olsem ol i laikim yu na dispela bai helpim yu skelim tingting bilong yu long ol wari yu gat long en. Sapos yu no painim ol gutpela ansa, yum as save olsem i gat sampela samting long laip we yumi no inap long senisim, na olsem, yumi mas akseptim tasol olsem.

God i laikim yu na i laikim yum as stap gut na amamas i stap. Putim tras o bilip bilong yu long em na long olgeta samting, maski i gutpela o nogat, God bai helpim husat i go long em.

God i ken givim yu wanbel na save na yuken go hetim gut laip bilong yu.

Pren bilong yu Laiplain

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laiplain

Dia Wantok Niuspepa, mi wanpela man bipo wok olsem kiap o patrol opisa, i gat save long wok bilong gavman na pablik ed-ministresen. Interes lain yu ken ringim mi long namba 7330 5164 o 7612 2898. Tenk yu, Wantok.

Dia Wantok Niuspepa, nem bilong mi Meli Peter Kongali, mi bilong Kandep, Enga provins. Mi laik painim longtaim pren bilong mi Karlin Amos bilong Rabaul bipo mitupela i skul wantaim long Pogera Luteran Praimeri skul long yia, 2013 i go inap 2005. Olsem tasol plis yu wanpela save long Karlin Amos, tokim em long kontektim mi long dispela namba 7263 6991. Tenk yu

Dia Wantok Nius, mi painim ol skul mate bilong mi long POMNATS (2004 -Gr.12 long wok bung wantaim. Nem bilong mi Mark Pato na namba bilong mi em 7386 3598. Tenk yu Wantok Nius long pablisim dispela tok save.

24/02/2014

Dia Wantok Niuspepa, mi painim Tonny Wilson na meri bilong em Mary Memafu. Tupela wantaim tisa, mipela i bin bung long Kiunga long 1988. Husat i save long tupela, plis tok save na ringim mi long dispela mobail namba 7295 0359.

Thomas McKembo - 24/02/2014

Dia Wantok Nius, mi laik soim bel hevi na wari bilong mi long Madang Pronvinsal Gavman wantaim Open memba bilong Raikos. Olsem wanem na ol no gat luksave long mipela. Tenk yu!

Dia Wantok Nius, Wantok Niuspepa i olsem gutpela sevis long yumi ol lain i no save long tok Inglis. Em tasol na husat i laik sapot yu welkam.

Albert Ake, WHP - 17/01/2014

Dia Wantok Niuspepa, mipela papa mama bilong Begesin long Madang provins i no amamas long wanem Brahman sekenderi skul i no save kisim stret ol pikinini bilong Usino Bundi na Gama i go long Braaman. Em i save kisim ol Katolik pikinini bilong arapela distrik tu i save i go skul long Brahman sekenderi. Dispela pasin ol i stret, mipela i askim gavman long kirapim wanpela haikul long Begesin na dispela i ken helpim olgeta pikinini bilong Usino Bundi na Gama stret. Mipela i askim Upper Ramu distrik DA wantaim edministresen tim bilong em long lukluk long dispela wari bilong mipela. Tenk yu!

Ezekiel Tai Ono, Begesin - 05/02/2014

Dia Wantok Nius, mi laik soim bel hevi na wari bilong mi long Madang Pronvinsal Gavman wantaim Open memba bilong Raikos. Olsem wanem na ol no gat luksave long mipela. Tenk yu!

Dia Wantok Nius, mi salim bel hevi bilong mi go long ol memba olsem gavana Powes Parkop tok long buai ban long NCD long TV. Mi lukim ol memba na ol man wan wok long kaikai na toktok long TV ya ol waitman tu was long Tv na lukim kantri stap. Man mi lukim long TV ol memba ol i laik toktok long ol pipel maus bilong ol i ret tru. Powes i no stopim ol. Yupela giaman long palamen i stap. Em tasol, tenk yu!

Mulange Samu - 11/02/2014

Ol meri long Kiunga kisim K1 milien

MEMBA bilong Not Flai na Minista bilong Kalsa, Turis na At, Boka Kondra i promis long putim K1 milien wantaim Nesenel Developmen Benk long helpim ol meri long Kiunga.

Em i bin mekim dispela tok promis long taim bilong greduesen seremoni bilong 256 meri long Kiunga, bihain long ol i pinisim tupela wik trening program bilong fainensel literesi. I bin gat tupela grup i kisim trening, wanpela bilong Ningerum Rurel na narapela bilong Kiunga taun.

Pohei Vokesenel Literesi Trening i bin go pas long givim dispela trening aninit long Nesenel Developmen Benk Meri long Bisnis Des trening program. Ol meri i kisim trening long wokim bisnis na long lainim wanem kain rot em i gutpela long lukautim ol bisnis mani bilong ol gut long mekim bisnis i kamap gut. Trening em bilong ol meri, tasol i bin gat sampela man tu i sindaun insait long dispela program.

Distrik Edministrata Dume Wo'o i tok Mista Kon-

dra i gat bikpela luksave long ol asples meri i mekim rot bilong ol yet long traim kirapim na ranim ol Liklik na Namel Sais (SME) bisnis.

Presiden bilong Westen Provins Meri long Bisnis Kopretiv, Mary Omkum i amamas na tok tenkyu long Minista Kondra long soim gutpela pasin.

"Dispela mani bai i givim bikpela sapot tru long gro bilong ikonomi na developmen bilong Kiunga na olgeta hap bilong Westen Provins," Misis Omkum i tok.

Misis Omkum i singaut long NDB i mas hariap wantaim wok bilong ol long putim wanpela ejen long Kiunga. Ol meri nau i gat save long kirapim na ranim bisnis wantaim planti helpim i stap klostu long ol. Na ol pipel i laikim dispela fainensol institusen i mas Nesenel Developmen Benk.

"Mipela i laikim NDB i kam long Kiunga bikos long planti yia ol pipel bilong mipela i no kisim ol sevis bilong NDB we ol narapela ol asples lain insait long PNG i save kisim long wokim bisnis." Misis



Ol meri Kiunga i greduet wantaim setifiket bilong Fainensel Literesi.

Omkum i tok.

Kiunga Taun Meia, Wilfred Whan i tok opis bilong em bai i givim spes long wok sapos wanpela NDB Ejen i kam long Kiunga, taim ol i wet yet long Kiunga NDB i opim brens bilong en.

NDB Meri long Bisnis Menesa, Janet Kaule i tok em

i bikpela samting long trenim na givim moa save long ol meri, yangpela na lapun wantaim.

"Trenim ol meri em i bikpela samting tru na NDB i laik save olsem ol meri i kisim sampela kain trening bilong kisim save long yusim mani na ranim bisnis na wanem kain krismas ol

i gat na wanem kain hap ol i stap long kantri, em i no ken pasim ol," Misis Kaule i tok.

"NDB i wok long helpim yet long lainim olgeta manmeri long pasin bilong sevim mani long benk, na ol kain trening em i mekim rot bilong tokaut moa long dispela tingting," em i tok

Bihain long dispela namba wan trening, ol meri i kirapim kopretiv ol i kolim, Westen Provins Wimen in Bisnis Kopretiv. Nupela presiden, Mary Omkum i tok ol i gat plen long givim moa trening long ol narapela meri insait long Westen Provins tu.

No gat bisnis long Sandaun boda - pipel go long Indonesia

Stanley Nondol i raitim

PAPUA Niugini i gat bikpela graun i stap yet na moa long 4 milien pipel i stap long ples i save kisim sapot long gaden kaikai na wok egrikalsa long painim mani.

Egrikalsa em i namba wan long kantri tasol gavman i no mekim inap wok long sapotim ol ples lain long ol i ken go het wantaim ol liklik bisnis long egrikalsa na go moa yet wantaim ol bikpela projek na kamapim moa winmani.

Ol arapela kantri long wol i save olsem PNG em i wanpela egrikalsa na fores kantri tasol gavman i lukluk tumas long oil, ges, gol, kopa na ol arapela mineral long maining.

Oposisen lida Belden Namah wantaim namba tu bilong em Sam Basil i mekim ol dispela toktok

taim tupela i go lukluk raun long Skotchio kakao plantasin na fementri projek na ol haus projek long Bewani las wik.

Haus na kakao projek long Bewani i stap 20 mita long boda mak bilong PNG na Indonesia.

Mista Nama i tok ol i no gat sans bilong mekim ol bisnis na tu i no gat ol gavman sevis long boda long mekim ol pipel bilong Sandaun boda i belisi na luksave olsem ol i sitisen bilong PNG.

Moa long 15,000 pipel bilong PNG i stap long boda bilong Sandaun na Indonesia i muv go long hap bilong Indonesai long kisim ol liklik sevis bilong gavman bikos no gat ol sevis long Sandaun boda na laip bilong ol i no isi.

Long 2012 nesenel ileksen ol lain long boda i les long vot maski ol i get nem long komon rol. Ol i



Kakao bin long Skotchio kakao plantasin na fementri projek.

tok ol les long vot bikos PNG gavman i no gat luksave long planti yia olsem ol i stap long hap bikos no gat ol sevis bilong gavman na ol i save wokabout i go ovasis, Indonesia long kisim gavman sevis.

PNG gavman i putim

Boda Developmen Atoriti (BDA) long lukluk raun na ripot bek long gavman long ol kain hevi long boda na bai gavman i ken putim mani na stretim ol sevis. Tasol opis bilong BDA i no wok gut na ol pipel long hap i kisim taim yet.

Mista Namah i holim wanpela miting wantaim Sandaun provinsal gavman long helpim ol pipel long boda long go insait long ol egrikalsa bisnis na ol arapela liklik bisnis long sapotim ol yet wantaim helpim bilong provinsal gavman.

Ela Motors tokaut long Yamaha klin wara sistem

Kolopu Waima i raitim

ELA Motors i bin holim wanpela wok-sop long tokaut long nupela Yamaha klin wara saplai sistem.

Klin Wara Group Menesa bilong Yamaha Moto Koporesen, Tatsumi Muneyasu na Sif operating opisa bilong Ela Motors Takeshi, i bin soim dispela sistem olsem wanem em i save wok.

Mista Muneyasu i tok Yamaha Klin Wara splai sistem em i sistem ii save kliarim gut wara i kam long bikpela wara na putim long tank bipo ol bai givim go long ol komyuniti.

Em i tok sistem bai klinim na rausim ol pipia, graun na ol arapela samting wara save karim kam. Dispela sistem bai holim na givim 8000 lita long wan wan de bilong dring na long wasim klos.

40% FARE

Our popular 40th Anniversary fare is back!

Available now until the 31st of March 2014.
So book early!!

Call toll free on **180 3444** or visit www.airniugini.com.pg and contact your nearest Air Niugini Travel Centre or Travel Agent for further details.

40
YEARS

Oro gavana laikim gavman yusim SABL ripot

Stanley Nondol i raitim

BIPO 97 pesen bilong graun em bilong ol papagraun na 3 pesen bilong gavman. Tasol namba bilong tumbuna graun i pundaun kam daun long 87 pesen. Bikpela graun i lus long pasin korapsen aninit long nem bilong mekim ol agro-bisnis.

Gavana bilong Oro, Garry Jufa i autim bel wari olsem planti wok painim na ripot bilong SABL i mas karim kaikai. Gavman i mas yusim ol dispela ripot bikos bikpela tumbuna graun i lus long pasin korapsen na go long han bilong ol ausait bisnis.

Ripot i tok moa long 5.2 milien hekta bilong graun i lus aninit long SABL na komisin bilong inkwairi i kamapim pinis ripot long SABL na i gat planti korap dil i kamap na bikpela graun em ol ausait bisnis i kisim.

Mista Juffa i tok SABL ripot i autim bikpela korap dil tasol gavman i no mekim wanpela samting long lo i ken mekim save long ol lain i asua.

Wankain taim PNG Iko Forestri Forum i tok moa long 5.2 milien hekta bilong bus i lus long han bilong ovasis kampani we ol i mekim bisnis bilong katim diwai long nem bilong agro-forestri projek. Forum i wari long ol papagraun i lusim 99 yia lis na laikim gavman long tebolim ripot bilong SABL.

Forum i mekim dispela singaut

bihain long wanpela ripot bilong Dokta Paul Nelson na Jenefer Gabriel bilong James Cook yunivesiti long Australia i kam aut long PNG midia i tok planti ol developa i giaman yusim nem wel palm na ol i mekim loging bisnis na kisim bikpela milien kina winmani.

PNG Eco Forestry Forum i tok tenkyu long ol Australia rises lain long tokaut long ol ausait bisnis save yusim giaman bisnis nem bilong egrikalsa na stilim tumbuna graun na bus bilong PNG. Dispela ripot i tok kantri mas lukluk kwiktaim long SABL ripot na mekim samplea samting long ol stil pasin kamap long tumbuna graun.

BISMARCK Ramu Group (BRG) long las wik i singaut long Praim Minista Peter O'Neill long sapotim ripot bilong Komisn ov Inkwairi siaman John Numapo na rausim olgeta SABL we bikpela graun bilong tumbuna i go long ol bisnis lain long stil pasin.

Mausman bilong BRG Rosa Koian i tok kampani i sapotim singaut bilong Mista Numapo long Mista O'Neill i mas rausim SABL na givim graun i go bek long ol papagraun.

Praim Minista Peter O'Neill i tokaut bihain long kisim ripot bilong Numapo olsem gavman bai rausim SABL na olgeta graun bai go bek long ol papagraun.

Mis Koian i tok Praim Minista i mas erausim SABL bikos 66 pela



GAVANA BILONG ORO: Garry Jufa

bilong 75 lis graun we wok painim i kamap i soim olsem ol bikpela kampani i kisim graun long stil pasin.

BRG i laikim O'Neill gavman bai -Rausim lis bilong SABL

-Givim graun go bek long ol tumbuna papagraun

-Kenselim olgeta Klerens Atoriti we ol i kisim long korap pasin

BRG i askim bilong wanem na gavman i no kwiktaim mekim dispela taim komisn i givim ripot pinis olsem em i askim long en bikos bikpela korap pasin i kamap long SABL na ripot i tok klia pinis.

Ol bisnis i pret long hevi bilong lo na oda: ADB

Stanley Nondol i raitim

long kantri.

Dispela wok painimaut i tokaut olsem long wok bisnis, kantri i gro insait long 10-pela yia stat long 2002 tasol hevi bilong lo na oda i wok long surik i go antap olgeta yia.

Rijonal Dairekta bilong ADB Dokta Andera Iffland i tok i gat bikpela nid long kantri i mas mekim long daunim dispela hevi bilong lo na oda na bai ol bisnis i ken gat bilip long kantri na mekim invesmen long helpim PNG.

Mista Iffland i tok gavman i mekim sampela senis na bisnis long kantri i gro tasol bikpela senis i mas kamap long lo na oda sekta long daunim ol hevi ol bisnis invemen i save bungim long kantri.

Wok painim bilong INA i tok olgeta bisnis i gat wari long stebiliti bilong rul na regulesen.

ADB i tok gavman na praivet sekta i mas wok bung na mas i gat konsaltesen long kamapim rifom na stretim ol rot long daunim hevi bilong lo na oda.

Dispela wokpainim i tok tu olsem, kantri i no gat gutpela infrastraksa olsem rot, bris, maket na pawa saplai na ol bisnis i wari long ol bai lusim mani na i no inap mekim inap profit.

PSDI i tok, kamapim rifom long ol bisnis bilong gavman i go long pablik -praivet patnasip bai helpim ol dispela hevi bilong infrastraksa.

WANPELA ripot bilong Asian Developmen Benk i tok maski PNG i lukim bisnis i gro long las 10-pela yia, hevi bilong lo na oda na korapsen i bikpela tru na pretim ol bisnis long kantri.

Dispela ripot i tok em i kisim ol sampela ripot moa long 130 kampani we PNG Institut bilong Nesenel Afes (INA) i tok rot long stopim ol hevi bilong lo na oda i kamapim hevi na i dia tumas long ol bisnis long kantri.

Ripot i tok lo na oda long kantri em i bikpela hevi tru na ol bisnis invesmen i mas lukaut bikos i no gutpela long mekim bisnis.

PNG Bisnis Sevei i mekim wok painim long ol planti ol bikpela kampani husat i mekim bikpela invesmen na i painimaut olsem hevi bilong lo na oda i bin mekim save long ol pinis na nau ol i wok long kisim ol praivet sekyuriti kampani long putim was long propeti na laip bilong ol.

ADB Pasifik Praivet Sekta Developmen Inisitiv (PSDI) i mekim dispela wok painimaut na bungim ol wankain ripot wantaim INA na i tokaut olsem ol bisnis i bungim bikpela salens bilong lo na oda insait

Air Niugini amamasim 40 yia long bringim sevis

Isaac Liri i raitim

LONG las yia, Air Niugini i bin kamapim ol promosen long winim ol fri sit long balus, na tu, kisim diskaun long prais bilong ol balus tiket.

Air Niugini i wokim ol dispela promosen long amamasim namba 40 yia bilong ol long bringim sevis long ol pipel bilong Papua Niugini.

Long go het wantaim ol promosen bilong Air Niugini long dispela yia, Jenerel Menesa Komesel bilong Air Niugini, Dominic Kaumu i tok olsem dispela promosen em i wanpela we bilong Air Niugini long tok tenk yu long ol manmeri husat i save sapotim ol.

Em i tok 40 pesen diskaun long ol balus fi em promosen, na dispela promosen bai lukluk long ol intenesenel na domestik flait wantaim.

Air Niugini i givim dispela tok save long dispela promosen long dispela wik, tasol promosen i bin stat pinis long namba 1 de bilong Februari, na long dispela taim i kam inap nau, ol i salim 21 000 sit pinis long diskaun prais.

Air Niugini i laik givim sans long

planti manmeri long kalap long balus, na ol i bilip olsem ol manmeri bilong Papua Niugini bai amamas long dispela promosen bilong ol.

Antap long dispela, Mista Kaumu i tok tu olsem ol i mekim sampela gutpela senis long ol sit bilong sampela ol balus bilong ol, na nau, ol manmeri husat i kalap long ol dispela balus bai i amamas long sindaun gut insait long balus.



Jenerel Menesa Komesel bilong Air Niugini, Dominic Kaumu.

BOS IGO MALOLO NA MIPELA DAUNIM OLGETA PRAIS

Mt. Hagen	↔	Wewak	K299
Kimbe	↔	Kokopo	K209
Lae	↔	Buka	K449
Lae	↔	Kimbe	K279
Lae	↔	Kavieng	K369
Lae	↔	Madang	K209
Lae	↔	Popondetta	K279
Lae	↔	Kokopo	K339
Lae	↔	Wewak	K349
Madang	↔	Kimbe	K399
Madang	↔	Wewak	K209
Port Moresby	↔	Goroka	K299
Port Moresby	↔	Alotau	K279
Port Moresby	↔	Mt. Hagen	K299
Port Moresby	↔	Kimbe	K299
Port Moresby	↔	Lae	K249
Port Moresby	↔	Madang	K299
Port Moresby	↔	Popondetta	K209
Port Moresby	↔	Wewak	K349

Kalap long balus namel long 1 igo 31 mun Mas 2014. Baim tiket namel long 27 mun Febuari 2014 igo 12 mun Mas 2014. Bukim long prais bilong W Class na bihainim Ruls bilong prais. Nogat planti sia.

Ringim 72222151 na toktok long mipela o go long www.apng.com



Lonsing bilong nupela kakao klon bai kamap long Basamuk

BIKPELA lausing seremoni long soim ol nupela kakao klon neseri na wok-bung namel long Ramu NiCo wantaim Kakao Kokonas Ejensi (PNGCCIL) insait long pablik-praivet patnasip (PPP) bai kamap neks mun long Basamuk.

Ol wok redi bai kamap sampela taim long neks wik i go antap long dispela seremoni i kamap, tasol ol i no tokaut yet long wanem taim stret. Tasol dispela em wanpela strongpela wok-bung pasin i kamap we bikipela nikel/kobalt developa insait long PNG, Ramu NiCo Menesmen (MCC) i sanap strong long mekim long strongim wok bilong agrikalsa developmen wantaim ol pipel insait long Projek Impeks eria bilong em long Madang provins.

Long Fraide, ol saveman bilong PNGCCIL olsem Provinsal Progem Menesa bilong CCIL, Vincent Saleh wantaim ol Komyuniti Afes Fil opisa bilong Ramu NiCo bai mekim lukluk raun i go long Basamuk long ol kakao neseri long ol viles we wok i kamap long sekim gut na redim wok bilong lausing i kamap.

Ol kakao famas long Basamuk long Raikos distrik long Madang provins em ol namba wan lain stret long Madang provins na kantri long kisim 10-pela kain nupela kakao sidlings em Kakao Kokonas Institiut PNG Ltd (PNGCCIL) i kamapim.

Ol famas i kisim ol dispela nupela kain kakao sidlings aninit long join pablik-praivet patnasip wok namel long CCI na Ramu NiCo.

Moa long 6,500 rutstok kakao klon bading i bin kamap yusim ol dispela nupela kakao pod bora resiten (CPB) klon budstik. Dispela bai halivim tru ol lain famas na papagraun klostu long Basamuk Rifaineri long Raikos distrik.

Ol dispela nupela kuru kakao ol i kamapim em K-4, K-6, K-9, 21:4/8, 17:2/16 na ol liklik olsem 16:4/2, 15:4/7, 37:13 3/2. Dispela em namba tu taim long PNGCCIL i kamaut wantaim ol nupela resistent kakao varaiti bihain long ol haibrid kakao long 1999 we i kam wantaim ol bikipela klon olsem 16: 2/3, 36:3/1, 37: 13/1, 73: 3/1 na ol liklik klon em 17: 3/1, 34:13/1 na 73:14/1.

Ol viles em Tugiak, Kulilau, Mingming, Dubal na ol arapela klostu long Ramu NiCo Basamuk Rifaineri bai namba wan lain long kisim na traime ol dispela klon we nogat sik nogut bilong kakao CPB i ken bagarapim ol. Dispela ol stok i ken go planti long taim bilong rihabilitesen. Ol dispela CPB resiten kakao i stap nau long PNGCCIL na ol famas i ken go kisim.


Distrik Liason na Fasiliti Opisa wantaim PNGCCIL husat i lukautim Sumkar distrik, Kanos Sulu i tok Raikos i laki stret long kisim ol dispela CPB resiten kakao we i ken abrusim sik nogut CPB, na tu kamapim wok kakao i go bikipela sapos fama i wok hat na givim moa taim long kakao gaden bilong em.

"Dispela nupela haibrid kakao i ken kamapim 2.5 i go 3 tan kakao long wan wan hekta bihain long 18-pela mun tasol na dispela em gutpela stret." Mista Sulu i tok.

Ramu NiCo fil ekstensen opisa, Daniel Aputa i tok bikipela as-tingting bilong Ramu NiCo na CCILPNGL em long kamapim ol kakao we i ken pait egensim sik CBP na tu kamapim moa kakao long ol diwai na givim gutpela mani long ol famas long ples.

Bikipela samting insait long wok bung namel long Ramu NiCo wantaim PNGCCIL em long helpim ol famas long ples long holim strong graun na wok agrikalsa maski olsem bikipela mineral developmen i kam long eria bilong ol. Dispela em bikos agrikalsa em bun na strong bilong yumi ol pipel blong PNG na dispela i mas stap strong long bihain taim mineral olsem nikel na kobalt i pinis long graun.

Agrikalsa em bun stret na Ramu NiCo i sanap strong long promotim agrikalsa long ol pipel insait long Projek impekt eria bilong em long Madang provins.



1. Naispela karim bilong kakao diwai.
2. Ramu NiCo fil opisa Daniel Aputa soim bading.
3. Ol saveman bilong CCIL husat i go wokim bading long Basamuk.
4. Famas bai gat gutpela gaden kakao.

RAMU NICO

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisani o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim kliia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

Ol rural fama sot long rais mil masin

James G. Kila i raitim

PLANTI ol fama long rurel eria long Madang provins i laik groim rais long gaden tasol no gat masin bilong milim rais blong ol na dispela i kilim indai intares bilong ol long wok bilong planim rais. Tasol Dipatmen ov Egrikalsa na Laipstok (DAL) Fud Krops dairekta long Madang, Mary Lilih i tok strong olsem ol fama long ples i mas traim painim rot long yusim ol tumbuna samt-ing olsem ol tongtong, na hap diwai long rausim skin bilong rais.

Wanpela model rais fama long Bom viles, William Wageng i traim sampela rot pinis long rausim skin na das long rais na em i strong olsem ol lokal teknoloji i ken helpim ol rurel fama long ples long kisim gutpela rais sapos ol i strong na wokim samtong long helpim ol yet.

William Wageng wantaim famili bilong em i no save baim rais long stua. Ol i kisim rais long gaden bilong ol na bungim i stap i go taim ol i laik kaikai ol i save go milim na kaikai.

Dispela fama em man tru long promotim lokal rais bilong Madang stret em ol i kolim "Magic Marasin".

William i yusim ol olupela pats na pedal na sen bilong baisikol ol wilwil long wokim

wanpela tresa rais-masin bilong rausim grein bilong rais

Wantok Niuspepa i bungim dispela man long ples Bom long Astrolabe Be long Raikos distrik long Madang provins.

William i maritim wanpela naispela meri nem bilong em Rudi na tupela i gat tripela pikinini. Dispela meri tu i save sapotim gutpela wok bilong William na ol program bilong wok William i save wokim i save ran orait tasol.

"Mi yet mi luksave olsem rais em wanpela kaikai, we bihain long yumi planim na larim i stap wantaim grein, em bai stap longpela taim insait long beg, na bihain yumi karim i go masinim na rausim pipia na yumi ken kaikai," William i tok.

Dispela toktok bilong William em trupela tok. Nau yet William wantaim meri bilong em Rudi na ol pikinini i no save kaikai ol rais bilong stua. Ol i save kaikai lokal rais bilong ol yet, em ol i kisim long gaden bilong ol yet.

William i stori olsem dispela tingting bilong wokim simpol tresa rais-masin long rausim rais long ol arapela pipia em yet i tingting na wokim.

"Mi yet bin gat baisikol mi save yusim pastaim long ran i go kam, na mi save painim ol hap hap pats nabaut na bungim i stap long yusim long fiksikim baisikol bilong mi,



Tupela mangi long Bogajim long Astrolabe Be wantaim lokal rais long beg long haus.

"Olsem na taim dispela tingting bilong wokim tresa rais-masin i kamap, mi yusim tasol ol pats olsem pedal na sen bilong baisikol long putim long sait sait long bet bilong tresa-masin long mekim em i raun raun olsem wilwil na wantaim ol sap bilong mambu mi nilim long wilwil, em bai rausim ol grein bilong rais," William i tok.

William yet em wanpela

gutpela fama husat em rais model fama bihain long tren-ing em i kisim long ol teknikal saveman bilong Japan Intenesenel Kopresen Ejensi (JICA) aninit long wok bung wantaim Madang Dipatmen ov Egrikalsa na Laipstok.

Williami tok rais em isi long groim long gaden, na i gat kain kain rais long groim we i ken go gut long wanem graun ol fama i laik planim long en.

Em i tok olsem ol famili bilong fama i mas wok bung wantaim long lukautim rais long gaden bilong ol long rausim gras na gu klinim eria oltaim.

Em i tok bihain long tripela o sikispela mun wanem kain rais fama i planim, ol sids bilong rais bai i redi nau long pikim long gaden. Bihain long fama i bungim rais i stap em i mas putim long beg na larim

long haus.

William i tok Madang provinsal gavman na tu ol memba bilong Palamen long wan wan distrik i mas sapotim ol lokal rais famas long go insait long kamapim moa prodaksen long helpim sindaun bilong ol long ples. Moabeta, ol memba i mas bai ol rais miling masin na larim long wan wan distrik long strongim wok bilong ol rais fama.

Ol geshaus i mas gat helti stendet

SINGAUT i go long ol menesmen bilong ol geshaus i mas gat helti na klinpela stendet olgeta taim.

Tred na Komes Minista, Richard Maru i bin tok olsem taim em i opim Samey Lodge long Pot Mosbi las Fraide.

Mista Maru i bin tokaut olsem nesenel gavman i gat wok long sapotim ol liklik na namel bisnis (SME) long kantri na gavman bai lonsim o tokaut long nupela polisi na masta plen bilong ol SME long mun Me long dispela yia.

Aninit long plen, ol bai wokim ol long strongim ol liklik bisnis insait long kantri we ol i ken gro gut na helpim ol pipel long laip na sindaun bilong ol.

Tu, ol bai glasim Risev lista we ol sampela wok em ol PNG manmeri tasol i ken wokim na i tambu long ol lain bilong narapela kantri long mekim.

Wankain tu long Tred na Invesmen Ekt o lo bai mas sanapim wanpela Foren Invesmen Riviubod, Nesenel Konten plen, SME Ekt na Fransais Ekt.

Mista Maru i tok ol SME bilong yumi i singaut planti taim long gavman i rausim sampela ol takis, na ol bai lukluk long dispela tu.


"Olsem wanpela gavman i laik helpim ol SME i gro, mipela i wok long painim rot long rausim ol sampela takis long helpim pipel bilong yumi. Bai mipela i tokaut long ol dispela long mun Jun long dispela yia. Long dispela taim, Sir Nagora Bogan na lain bilong em i mekim ol wok long dispela," Mista Maru i tok.


Taim Mista Maru i tok tenkyu long menesmen bilong Samey Lodge, em i bin tokim ol long gat gutpela na klinpela haus, na gutpela stendet bilong hajjin i mas stap olgeta taim.




DRINKERS & FEEDERS

Buy 2 x 20kg Tablebirds Stockfeed & recieve 2Ltr Drinker or 3kg Feeder
Buy 2 x 40kg Tabebirds Stock Feed & recieve a 4Ltr Drinker or 6kg Feeder

FREE








AVAILABLE AT PARTICIPATING DISTRIBUTORS NATIONWIDE

LAULAU:



DISPELA liklik boi Presley Stanley i amamas tru long kaikai laulau wantaim tumbuna man bilong em taim Wantok i bungim em long Finsch Rot long Nu Taun, Madang. Nau em taim bilong ren na san wantaim na planti ol kain kain prut na kumu i pulap stret long ol maket long Madang taun. Presley i kisim laulau arere tasol long haus bilong ol. Dispela stail mangi husat i gat tupela krismas em mangi bilong toktok na pilai na hambak tu wantaim. Poto na stori: **James G. Kila**

Isaac Liri i raitim

Long las wikend, tupela biknem ragbi lig pilaia bilong Australia i kam long Papua Niugini long stap long lonsing bilong ol PNG Hunter, na tu, long toktok wantaim Papua Niugini Ragbi Futbal Lig (PNGRFL) long strongim ragbi lig long Papua Niugini na Saut Pasifik.

Long taim tupela i pundaun long ples balus long Fraide, Minista bilong Spot Justin Tkatchenko, Siaman bilong PNGRFL Sandis Tsaka na Sif Eksekyutiv Opisa (CEO) bilong PNGRFL Brad Tassel i bin stap long ples balus long tok welkam long tupela.

Tupela ragbi lejen i tok olsem ol i save amamas tru long kam antap olsem long Papua Niugini.

"Namba wan taim bilong mi long kam long dispela naispela kantri em long yia 1983, mi bin kam olsem wanpela pilaia wantaim Kwinslan tim, na mipela i bin pilai long Pot Mosbi na Hagen.

"Long dispela taim mi bin lukim olsem Papua Niugini em i wanpela naispela ples tru insait long Saut Pasifik, na tu, em stap klostu tru long ples bilong mi long Kwinslan Australia. Long dispela taim mi save kam long Papua Niugini planti taim liklik long lukim ples na i no long pilai ragbi tasol," Wally Lewis i tok

Namba wan taim bilong Andrew Johns long kam long Australia em long 1996 taim em i stap long skul bois tim bilong Australia.

Andrew i tok em i no save kam long Papua Niugini long pilai ragbi tasol. Sampela taim em i save kam long ski long solwara long ol holide bilong em, na i save amamas long bungim na toktok wantaim ol manmeri bilong Papua Niugini, na tu, lukim ol ples nabaut.

Long Sarere tupela ragbi lejen i bin stap long opisal lonsing bilong ol PNG Hunter. Long hap tupela i bin tok olsem ol i amamas tru long lukim olsem Papua Niugini i gat wanpela tim insait long Intrast Supa Kap.

Andrew Johns i tok olsem nau taim ol Hunter i pilai insait long wanpela kompetisen long Australia, dispela bai strongim ol ragbi lig pilaia bilong Papua Niugini long pilai long intenesenel level. Na tu, em bai strongim tingting bilong ol yangpela long Papua Niugini long pilai strong na kamap ol ragbi sta long bihain.

Wally Lewis i tok olsem dispela bai i strongim ol arapela Pasifik ailan kantri olsem Fiji, Samoa, na Tonga long kamapim wanpela tim long pilai long ol kompetisen long Australia tu.

Tupela i tok olsem Papua Niugini i givim gutpela eksampel long ol Pasifik ailan kantri, na tu, long wol, na ol i amamas long dispela.

Long Sande moning, tupela i bin raun i go long Kaugere oval na bungim ol sapota na ol arapela ragbi lig pilaia bilong Papua Niugini, na bihain long apinun tupela i go bek long Australia.

Raun bilong ol ragbi lejen long Papua Niugini



(L-R) CEO bilong PNGRFL Brad Tassel, Andrew Johns, Minista bilong Spot Justin Tkatchenko, Wally Lewis na Siaman bilong PNGRFL Sandis Tsaka.



Wina meri long go wantaim Hunter long namba wan pilai bilong ol long Australia i sanap wantaim tupela Lejen bilong ragbi lig long Australia. Ol Poto Nicky Bernard.

K171 Millien long stretim ragbi fil

Isaac Liri i raitim

K171 millien em mani mak bilong stretim nupela Lloyd Robinson Ragbi oval long Pot Mosbi. Minista bilong Spot Justin Tkatchenko i tokaut long las wik.

Ol spot manmeri bilong Pasifik husat i kam long pilai long 2015 Pasifik Gems bai yusim dispela nupela Lloyd Robinson oval.

Dispela oval bai i kamap nesanel stadium bilong kantri, na ol bikpela intenesenel na nesanel gem bilong ragbi lig, yunion na soka bai i kamap long dispela nupela nesanel stadium.

Kontraksen wok i kamap nau long hap, na ol ragbi tim na kompetisen husat i save yusim ol dispela fil bai yusim ol arapela fil long Murray Bareks na long Kaugere.



Wally Lewis i tok Papua Niugini i givim gutpela eksampel long ragbi lig long Saut Pasifik.



Andrew Johns i amamas long lukim ol PNG Hunter i pilai long Intrast Supa Kap.

Skul Kriket Program i gutpela long ol pikinini

Isaac Liri i raitim

Dispela program i bin stat long 2010, na long lukluk bilong Kili Tambua, BSP Deputi Jenerel Menesa bilong Reteil Benking.

Em i tok olsem dispela program i gro, na tu, program i helpim planti ol pikinini long stap gut long skul wantaim gutpela pasin bilong harim tok.

Mista Tambua i tok olsem planti skul i amamas long dispela program, na ol i laik wok bung wantaim BSP na Cricket PNG long sapotim dispela program long wanem, ol i lukim gutpela bilong en.

BSP Skul Kriket Program i gat plen long kisim o pulim 150,000 pikinini long stap insait long dispela program long dispela yia.

Long las yia, 171,500 pikinini insait long 297 skul long Papua Niugini i bin stap insait long dispela Skul Kriket Program.

Long dispela wik, Bank South Pacific (BSP), namba wan sponsa bilong 2015 Pasifik Gems i opim Skul Kriket Program bilong dispela yia long Hohola Demonstresen Skul long Pot Mosbi.

Astingting bilong BSP na Cricket PNG long dispela yia em long wok strong long mekim Skul Kriket Program i kamap bikipela, na tu, kisim intres bilong planti yangpela insait long kantri long pilai kriket.

Ol sumatin bilong Hohola Demonstresen long Pot Mosbi i lainim sampela skil bilong pilai kriket long taim BSP na Cricket PNG i opim Skul Kriket Program bilong dispela yia.



Admiralty FC mekim histori

Isaac Liri i raitim

Benson i bin sevim 6-pela gol long namba wan hap bilong gem.

Bipo long namba wan hap bilong gem i pinis, Moffat Kalifa, Solomon Ailan pilai bilong Admiralty i skoim namba wan gol bilong gem, na skoa long hap taim i bin stap olsem 1-0.

Long namba tu hap, ol Eastern Stars i spitim gem bilong ol, tasol difens bilong Admiralty i bin strong tru, na ol i stopim ol straika bilong Eastern Stars long skoa.

Long namel bilong namba tu hap bilong gem, Pettyson Elijah bilong Admiralty i skoim tupela gol na dispela i bin mekim ol pilai bilong Eastern Stars i givap na pilai olsem ol liklik mangi.

Ol sapota bilong ol Eastern Stars i bin stap isi tru long ol las minit bilong gem.

Long ol arapela gem bilong NSL, Hekari United i winim Oro FC 3-0, na Gira Morobe United i winim Besta PNG 2-1, Lae FC i bin stap long bai.

LONG raun 3 bilong Nesenel Soka Lig (NSL), nupela tim Admiralty FC i mekim histori taim ol i winim Eastern Stars 3-0 long Bisini soka graun long Pot Mosbi las wik.

Dispela em namba wan win bilong Admiralty long NSL, na olgeta pilai, opisal na sapota i singaut na amamas tru taim gem i pinis na referi winim wisil.

Long stat bilong gem, ol straika bilong Eastern Stars i bin gat planti sans long skoa, tasol kik bilong ol straika i no bin kam gut, na planti bal i abrusim gol mak na go outsait.

Long namel bilong namba wan hap, Admiralty i spitim gem bilong ol. Tupela straika bilong ol Mark Gabono na Pettyson Elijah i bin gat planti sans long skoa tasol gol kipa bilong ol Eastern Stars, Felix Benson, i bin stopim bal long go insait long gol mak. Felix



KEPTEN BILONG OL HUNTERS: ISRAEL Eliab em namba wan Kepten bilong PNG Hunters Tim husat bai pilai long Kwinslen Kap long stat bilong mun Mas. Ol bod na menesa i makim em bihain long em i soim ol long tupela pren pilai long Bisbane na Canines taim em i kepten. Israel i gat 24 krismas na em i save pilai faiv et posisen bilong Vipers tim bilong Mosbi long Digicel kap resis. *Poto Nicky Bernard.*



Ol LLG mas sapotim spot developmen

OL Presiden bilong ol Lokal Level Gavman (LLG) insait long kantri i gat fainensel pawa insait long wan wan eria bilong ol. Dispela i putim ol long gutpela posisen long kamapim gutpela spot developmen long ol eria bilong ol.

Insait long ol LLG, bikipela mani i save go long ol arapela komyuniti projek, na ol spot ektiviti na developmen program i no save kisim bikipela mani tumas.

Yumi ol pipel bilong Papua Niugini i mas save olsem spot i ken kamapim gutpela sindaun long ples bilong yumi, na yumi no ken les long putim mani go insait long kamapim ol wok bilong spot.

Spot i ken helpim yumi long develop olsem ol gutpela pipel, na tu, spot i ken bringim mani kam insait long ol komyuniti bilong yumi na kamapim ol gutpela spot fasiliti bilong yumi long yusim.

Sapos yumi gat ol gutpela spot program insait long ol komyuniti bilong yumi, ol manmeri bilong komyuniti bai kamap ol gutpela sitisen, na bai yumi lukim olsem ol kain kain bikhet pasin bai i no inap bikipela tumas.

Spot i ken senisim laip bilong ol manmeri, na tu rausim ol bikhet pasin we ol i save wokim. Spot i ken mekim tingting bilong ol manmeri i klia.

Sapos ol komyuniti i gat ol kompetisen na ol tonamen, ol manmeri bai bisi, na ol i no inap putim ol yet i go insait long ol nogut ektiviti we i save kamapim bagarap.

Ol kompetisen na tonamen i ken helpim ol manmeri long lukim trupela mining bilong spot.

Olgeta LLG Presiden insait long kantri i mas lukim spot olsem wanpela bikipela samting long sait bilong developmen.

Olgeta LLG Presiden i gat responsibiliti long sapotim spot developmen.

- Weekend sofbal dro -

SEASON PROPER - ROUND TWO, GAME NINE
Saturday, 1st March 2014

TIME	TEAMS	TEAMS	GRADE	REMARKS
8:00 - 9:00	Juniors	v		Teeball
9:00 - 10:00	Stingers 1	v	TBC	0/16
10:00 - 11:00		v		
11:00 - 12:15	WANTOKS	v	STINGERS	B
12:15 - 13:30	BEARS	v	CHEBU	B
13:30 - 14:45	WANTOKS	v	STINGERS	A
14:45 - 16:00	BEARS	v	CHEBU	A
BYE	ADMIRALTY A & B			

TIME	TEAMS	TEAMS	GRADE	REMARKS
8:00 - 9:00	Juniors	v		Teeball
9:00 - 10:00	Stingers 2	v	Admiralty Sisters	0/16
10:00 - 11:00		v		
11:00 - 12:15	UNITED SISTERS	v	GAZELLE	B
12:15 - 13:30	YOKOMAD	v	WOLVES	B
13:30 - 14:45	UNITED SISTERS	v	GAZELLE	A
14:45 - 16:00	YOKOMAD	v	WOLVES	A
BYE	ADMIRALTY A & B			

Intrust Super Cup 2014

Round One (Mach 1st - 2nd)		
Mackay	Vs	Easts
Redcliffe	Vs	PNG
Norths	Vs	Ipswich
Wynnum	Vs	Tweed
Burleigh	Vs	Capras
Pride	Vs	Sunshine Coast
Souths		Bye

Telikom National Soccer League Draw

Round	Date	Time	Team A	Vs	Team B	Venue
			Admiralty FC	Vs	Gigira Laitepo Morobe FC	Bisini/Pom
4	1st - Mar	12.30pm				
		3.00pm	Oro FC	Vs	Lae FC	Bisini/Pom
		3.00pm	Besta FC	Vs	Hekari FC	SIK/Lae
Bye			Eastern Stars FC			



Saut Afrika i selebretim win long Australia long namba tu Test kriket Sen George Pak long Pot Elizabeth long Saut Afrika.

Kriket



JP Duminy bi-long Saut Afrika apim bat bihain long em i mekim 100 ran egens Australia seken tes kriket gem long Sen George's Pak long Pot Elizabeth long Februeri 21, 2014.

Sochi Winter Olympic i pinis na hia ol sampela ol gutpela piksa long klosing seremoni bilong em. Kainkain kala danis na pilai i kamap long dispela de....





Wantok

Niuspepa Bilong Yumi OI PNG Stret!

Circulation & Distribution Supervisor

WantokNiuspepa is the only Tokpisin Newspaper in the country operating since 1970s. It is distributed through street and retail agents, subscribers and free copies to churches and schools. With enhancements to business, we now have an opportunity for a Circulation & Distribution Supervisor in Port Moresby reporting to the Circulation & Distribution Executive.

The key responsibilities of the position are to ensure;

- The production of the Wantok products is in line with management decision with minimal down time and wastages to control efficiency and profitability
- On time and in full deliveries to the outer regions through airfreight and local deliveries in NCD including churches and schools
- Wantok is represented well in the market place with appropriate merchandising to support brand image and increased sales
- The merchandising and delivery listing is updated at all times for material planning and effective delivery.
- The sales reconciliations are done on timely basis as required with key circulation and distribution agents.
- Good working relationship exists with all the distribution channels.
- New markets are established to extend the circulation network

Selection Criteria.

- Certificate or Diploma in Business studies with relevant work experience
- Experience in supply and distribution process
- Computer skills in Word & Excel are desirable.
- Must be able to support team work
- Have a current drivers licence

Send your applications to:

The Recruitment Team,
Word Publishing Company,
PO Box 1982, **BOROKO**, NCD
or email admin@wantok.com.pg

Oi spot eksen poto long wiken...

Oi Poto Nicky Bernard.



KAM KLOSTU: Gol Suta bilong Datec Mona Korena i putim ai long pilai bilong em long salim bal taim gol kipa bilong Pro-Clean Ilmah Kokena i putim was long gen fainal pilai bilong Praivet Netbal resis long Mosbi. Datec i winim dispela gren fainel.



Namel man bilong Eastern Star wantaim bal i redi long pasim taim pilai bilong Admiralty i traim long rausim bal long lek bilong em long namba tri raun bilong NSL long Pot Mosbi. Admiralty win 3-0



Gavana Parkop wantaim Eksektiv Opisa bilong em na meri bilong em i amamas wantaim bik nem ragbi pilai bilong Australia Andrew Johns.



TOP KETSA: Stingers ketsa Nikkii Simba i ketsim wanpela strongpela bal kam long piksa bilong em taim ol i bungim Sisters long sofbal pilai bilong ol meri long Bisini.



Wing Difens bilong Kina Finance i lukluk long ol pilai bilong em long pasim bal tasol GK bilong Boroko Motors i no lusim em liklik long A gret netbal gren fainel bilong praivet netbal kompetisen.



BAI YU GO WE: Gol Defen bilong Pro-Clean i kalap long kisim bal tasol wing atek bilong Datec i no tromoi bal.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



Moa oil na meat insait



HAI SORI: Straika bilong Admiralty Pettyson Elijah(16) i putim bal long lek bilong em tasol ful bek bilong Eastern Star i strong long rausim long lek bilong em taim narapela pilaia bilong Stars i putim was. *Poto Nicky Bernard.*

PNG bai strongim ragbi wantaim Australia

Isaac Liri i raitim

SIAMAN bilong Papua Niugini Ragbi Futbal Lig (PNGRFL), Sandis Tsaka, i tok Papua Niugini i mas gat gutpela koneksen wantaim Australia long ragbi lig.

Gutpela koneksen bai helpim Papua Niugini long kamap strongpela ragbi lig kantri long wol long nau, na long taim bihain.

Long strongim dispela koneksen, PNGRFL i bin kisim Wally Lewis na Andrew Johns i kam insait long kantri long las wik.

"Wally Lewis em bilong Kwinslan, na Andrew Johns

em bilong Nu Saut Wels. Dispela tupela man em ol biknem man long ragbi lig, na ol i gat planti gutpela koneksen."

PNGRFL i kisim tupela i kam long wanem, ol i laik strongim dispela koneksen wantaim Kwinslan na Nu Saut Wels. PNGRFL i bilip olsem dispela tupela stet bai helpim ragbi lig long kantri long develop," Mista Tsaka i tok.

Mista Tsaka i bin tok tenkyu long dispela tupela ragbi sta tu long tok yes long kam long Papua Niugini.

"Kam bilong tupela i soim olsem ol i gat bikpela laik long strongim ragbi lig long

Saut Pasifik rijon," Mista Tsaka i tok.

Wally Lewis na Andrew Johns i tok olsem tupela i save amamas long kam long Papua Niugini, na tupela i amamas long helpim ragbi lig long Papua Niugini long kamap bikpela.

"Mipela bai helpim Papua Niugini long givim sapot, na tu, tokim ol arapela long Australia olsem Papua Niugini i wok long develop long ragbi lig, na Australia i mas lukluk long selektim planti pilaia long Papua Niugini long pilai long Australia. Na sapotim ol ragbi lig developmen program bilong Papua Niugini," Wally Lewis i tok.

Intrast Supa Kap Dro
 - Pes 25



Ol spot poto
 - Pes 27



Featured Product

Wheel Chair K920



Good Products, Better Prices i kam long

Johnstons Pharmacies Ltd

Phone: 325 3185 Fax: 325 0190: Email: sales@johnstons.com.pg